

DI'IDZA' BZU SAN PABLO APÓSTOL LË'Ë GUICHI, USE'ELA'NË'N LAO CIUDAD ROMA

Baose'ela' Pablo guichi ni lao ben' nao xneza Jesús, ben' nita' ciudad Roma

¹ Në'ëdi', Pablo, naca' ben' zulao xa'nro Jesucristo. Ulio Diuzi bdë'në' në'ëdi' apóstol quienë' ta tzetixogui'a yaca benë' di'idza' la'iya quienë'.

² Azio zë iza bë Diuzi ca unanë' huenë' con cabë' rna di'idza' la'iya quienë'. Quie lena' bënë' mandado bzu yaca ben' naca profeta quienë' xti'izdë' lë'ë guichi. ³ Lëdi'idza' na' rguixogue'n quie xa'nro Jesucristo, ži'i Diuzi. Na'ra con cabë' gologuë' guquë' be'mbyu, cana' naquë' ži'i suba rey David. ⁴ Pero con cabë' gutië' bebannë' tatula, lena' bzioñe'e Bichi Be quie Diuzi ra'o de que naca Jesucristo ži'i Diuzi, ben' de yela' rnabë' quie. ⁵ Nun quie Jesucristo bë Diuzi tu cule že quiendo', use'elë' nëto'tzetixogue'ndo' xti'izdë' cuenda gata' ben' nao xneza Jesús duže yedyi layu huejë' Jesucristo ben' že. ⁶ Lëscan' le'e, ulio Diuzi le'e gacale ben' nao xneza Jesús.

⁷ Lena' use'ela' guichi ni lao le'e ben' nita' ciudad Roma nun quie nedye'ë Diuzi le'e, ulionë' le'e gacale ben' la'iya quienë'. Rulidza' Xuziro Diuzi len xa'nro Jesucristo ta huela'iyajë' le'e, cuëchijë' chizi lu'u guichi laxta'ole.

Gu'un Pablo tzioguë' ciudad Roma

⁸ Tanëro re'enda' inia' le'e de que lao Jesucristo rulidza' Diuzi yëpa'në' diuxcalelo' por lao le'e, como dan' yugulu ben' nita' lao yedyi layu arnëyaquë' ca tadya'a ruele, rue quiele quie Diuzi. ⁹ Du guicho du la'adya' rua' ca mandado rue Diuzi në'ëdi', rguixogui'a yaca benë' cabë' naca quie ži'inë'. Naca Diuzi testigo de que yugu dza reza'la'adya' le'e rulidza' Diuzi ta gacalënë' le'e. ¹⁰ Yugu dzacazi rulidza' Diuzi chi rapë' gusto ta guida' ideyuba' le'e. ¹¹ Cana' re'enda' idena'a le'e ta idesëdira' le'e ta tzioñe'ele mazara ca naca pensari quie Diuzi cuenda huera quiele xti'idza' Diuzi. ¹² Cana' re'enda' cuenda uxela'adya' le'e, hue quiele xti'idza' Diuzi, lëscan' cuenda uxela'adyi'le në'ëdi', hue quia' xti'idza' Diuzi ca naca quiero rzudyi'ilëro Diuzi.

¹³ Bicha', re'enda' inezile lega raca' pensari guida' ideyuba' le'e pero birzaque'da'. Re'enda' guida' ta gacalia' le'e inaorale mazara xneza Diuzi cabë' bia' gucalia' yaca ben' tula, ben' nita' yedyi tula. ¹⁴ Lega de compromiso quia' quixogui'a yugulu benë' xti'idza' Diuzi, la'acazi ben' nita' lao ciudad že, la'acazi ben' nita' lao yedyi dao', la'acazi ben' rioñe'e, la'acazi ben' birioñe'e. ¹⁵ Por tu parte quia', zucaza' dispuesto guida' laole ciudad Roma idetixogui'a le'e di'idza' la'iya quie Diuzi.

Napan fuerza valor xti'idza' Diuzi

¹⁶ Biredue'da' quixogui'a ja benë' di'idza' la'iya quie Diuzi, como dan' napan fuerza valor quienë' ta ute uselanë' nutezi ben' hue quie xti'idzë'

gata' yela' neban quiénë' tuzioli. Tabelaora na' te ila yaca ben' Israel, pero lëscan' nacan belao te ila yaca ben' tula, ben' binaca ben' Israel. ¹⁷ Rguixogue' di'idza' la'iya quie Diuzi ra'o cabë' re'ennë' sudyi'iléro lëbë' ta ilë'ënë' ra'o ben'laxta'o yëri. Tuzi ta huero sudyi'iléro lëbë', cana' ilë'ënë' ra'o ben'laxta'o yëri. Lena' rguixogue'n lë'ë guichi la'iya quie Diuzi cani: "Nu ben' ilë'ë Diuzi ben'laxta'o yëri, hue' Diuzi lëbë' yela' neban tuzioli nun quie dan' rzudyi'ilënë' lëbë'."

Napa yugulu benë' dula' xquia

¹⁸ Na' zu Diuzi guibá huenë' castigo quie yugulu ben' mala, ben' rue ta biraxenë'. Yela' ben' mala quiejë' biruejë' lato tzu'ujë' pensari quie Diuzi ta inezijë' ta naca tali quie Diuzi. ¹⁹ Dyë'ëdi nezijë' zu Diuzi guibá, como dan' cuin Diuzi blu'enë' leyaqué' zunë' guibá rlë'ëyaqué' ta bza-lonë' uléchinë' lao yedyi layu. ²⁰ Rulu'ecazin zu Diuzi guibá la'acazi bisaque' ilë'ërogue', porque huazaque' ilë'ëro ta uléchinë' lao yedyi layu. Desde dza bzalo Diuzi yedyi layu, bablu'en zucazi Diuzi guibá, de yela' rnabë' quiénë' tuzioli. Quie lena' bisaque' ina yaca benë' binezijë' chi zu Diuzi guibá. ²¹ Ba'ala'cazi nezijë' zu Diuzi guibá, birapala'një' lëbë', nica rëbijë' lëbë' diuxcalelo', pero yu'uyaqué' pensari mala, pensari bibizaca'n. Naca laxta'oje' laxta'o yaladyi', rdayaque' lao lato lao chula. ²² Ba'ala'cazi najë' nacajë' ben' rioñe'e, dechan' birioñe'ejë'. ²³ Lao laza rionla'adyi'jë' Diuzi, ben' zu tuzioli, rionla'adyi'jë' yaga ta pcha'a yaca benë', bëjë' forma quie benë' ta bizu tuzioli.

Hasta rionla'adyi'jë' yaga pcha'a yaca benë', bëjë' forma quie nu bguini, nu bëla, nu bia zu tapa ni'e.

24 Quie lena' apsanla'adyi' Diuzi lejë' ta ruejë' tamala ca raxejë'. Quie lena' ruelëjë' laguedyijë' ta naca stu' sla'na. **25** Cana' raca quiejë', como dan' birue quieyaquë' xti'idza' Diuzi. Quie lena' apsanla'adyi' Diuzi lëjë' ta hue quieyaquë' ta binaca tali. Cala Diuzi rionla'adyi'jë'. Lao laza Diuzi, rionla'adyi'jë' ta bzalo Diuzi uléchinë' lao yedyi layu. Birionla'adyi'jë' tuzi Diuzi, ben' reya'ala' tzionla'adyi'jë' tuzioli. Amén.

26 Quie lena' apsanla'adyi' Diuzi leyaquë' ta rueyaquë' ta naca stu' sla'na quiejë'. Hasta nigula quiejë' bira re'enjë' gasilëjë' be'mbyu quiejë'. Bare'enjë' gasilëjë' laguedyi nigulajë' ta huelëjë' laguedyi nigulajë' ta naca stu' sla'na. **27** Lëscan' ca raca quie yaca nigula quiejë', cana' racarë quie yaca be'mbyu. Bira re'enjë' gasilëjë' nigula quiejë'. Barza'la'adyi'jë' gasilëjë' laguedyi byujë' ta huelëjë' laguedyi byujë' ta naca stu' sla'na. Tanun quie ruejë' cana', racajë' castigo rbiagui'neza cuerpo quiejë'.

28 Como bire'enyaquë' huebë'yaquë' Diuzi, lena' apsanla'adyi' Diuzi leyaquë' ta yu'uyaquë' pensari bayatza rueyaquë' ta naca stu' sla'na. **29** Lega raxejë' huejë' tabayatza. Rutila rudzagajë' con nutezi nigula, rguilojë' ga huejë' tamala, rzala'adyi'jë' dumi, re'enjë' gaca tamala quie laguedyijë', racazë'jë', rutijë' benë', rguilojë' dila, rzi'jë' yë', rlë'ëjë' laguedyijë' ben' mala, ru'eyaquë' di'idza' bižu. **30** Rnëjë' contra nutezi benë', barnaya'jë' Diuzi, birapajë' respeto yaca

benë', ruejë' cuinjë' ben' že, rguilojë' ruejë' tamala, biralejë' quie xuzi žna'ljë'. ³¹ Birioñe'eje' biruzujë' di'idza', binedyë'ljë' familia quiejë', birzi'žejë' quie benë', bireyëchi'la'adyi'ljë' benë'. ³² Ba'ala'cazi nezijë' cabë' nachuguli Diuzi quiejë' huejë' castigo quiejë' tziojë' lao gui' gabilia, nenaojë' neruejë' pensari mala quiejë', redaohuejë' re'enjë' hue yaca ben' tula cabë' ruejë'.

2

Puro ta naca tali ina Diuzi

¹ Quie lena' bide bihuele ta huele defender cuinle lao Diuzi, nuti'tezi nacale, chi rnale rue laguedyile tamala, na'le'e tu lëbizi ziole ruele cabë' tamala rnale rue laguedyile. Conlë di'idza' rero lu'u ru'ale rulu'en lëscan' le'e nacale ben' mala. ² Neziro ta naca tali rchuguli Diuzi huenë' castigo nu ben' rue tamala. ³ Le'e rnale rue laguedyile tamala, na'lëbizi ziole ruele tamala, ¿raquele bihue Diuzi le'e castigo? ⁴ ¿Quele aoquixile binezile ga huen dyin yela' ben' huen quie Diuzi? ¿Quele binezile rue Diuzi tahuen quiele rbezë' yetza'le pensari quiele inaole xnezë'? ⁵ Pero ben' yaladyi' nacale, bire'enle yetza'le pensari quiele. Quie lena' huata' castigo huala quiele dza hue Diuzi juicio. Huachugulinë' ta tzu'u ni'a xnezi quiele. ⁶ Huaguižunë' quie quiero segün ca bëro. ⁷ Hue'në' yela' neban tuzioli yaca ben' biyeyati hue tahuen yugu dza, yaca ben' re'en gata' yela' bala'ana quiejë' lao Diuzi, yaca ben' rbeza gata' quieyaqué' ta biyeyudyi yedu. ⁸ Pero huadza' Diuzi huenë' castigo yaca ben' bire'en uzu di'idza' quienë',

yaca ben' bire'en inao neza li quienë', yaca ben' re'en inao neza mala. ⁹ Yugulu ben' rue tamala yedzagalaoyaquë', huata' tazëdi gula quieyaquë'. Chi ben' Israel yedzagalaorayaquë', pero chi ben' tula, lëscan' yedzagalaoyaquë'. ¹⁰ Pero yugulu ben' rue tahuen, hue Diuzi leyaquë' ben' ūe, cuéchinë' chizi laxta'oyaquë'. Chi ben' Israel hueranë' leyaquë' ben' ūera, pero chi ben' tula, lëscan' huenë' leyaquë' ben' ūe.

¹¹ Cana' hue Diuzi, porque birue Diuzi natza'la quie yaca benë', tuzcazi ca ruenë'. ¹² Pues yugulu ben' rue xquia, pero binezijë' con cabë' rna lë'ë guichi ley na' pca'n Diuzi lao na'a Moisés, huachuguli Diuzi lëjë', pero bihue Diuzi cuenda con cabë' rna lë'ë guichi ley na'. Lëscan' yaca ben' rue xquia nezijë' con cabë' rna lë'ë guichi ley na', huachuguli Diuzi lëjë' huenë' cuenda con cabë' rna lë'ë guichi ley na'. ¹³ Birlë'ë Diuzi ben' laxta'o yëri ben' ruzénagazi con cabë' rna lë'ë guichi ley na', na' biruzunë' di'idza' con cabë' rnan. Rlë'ë Diuzi ben' laxta'o yëri ben' ruzénaga con cabë' rna lë'ë guichi ley na', na' ruzunë' di'idza' con cabë' nan. ¹⁴ Na'ra quie ja ben' binaca ben' Israel, cati ruzujë' di'idza' con cabë' rnan lao guichi ley na', la'acazi binezijë' chi de guichi ley pca'n Diuzi lao na'a Moisés, lena' rulu'en naca pensari quiejë' conforme con cabë' rnan lë'ë guichi ley na'. ¹⁵ Pues nun quie naojë' neza dya'a, lena' rulu'en yu'ujë' pensari con cabë' rnan lë'ë guichi ley quie Diuzi. Ca naca pensari yu'ujë', lena' rulu'en quiejë' nezcazijë' ca re'en Diuzi huejë'. Cuincazi pensari quiejë' yu'ujë' rchugulina quiejë' chi ruejë' tahuen, chi ruejë' tamala. ¹⁶ Dza hue

Diuzi juicio huachugulinë' con cabë' bë yaca ben' raque nagachi'zi bëjë' bin' bëjë'. Lao na'a Diuzi huachuguli Jesucristo yaca benë' conforme con cabë' rna di'idza' la'iya quienë'. Lëdi'idza' na' rguixogui'a yaca benë'.

*Ni rnán quie ben' Israel len guichi ley pca'n Diuzi
lao na'a Moisés*

¹⁷ Pero le'e rnale nacale ben' Israel. Raquele huezi' Diuzi le'e nun quie naole guichi ley pca'n Diuzi lao na'a Moisés. Ruele dzalo inale nacale ben' quie Diuzi. ¹⁸ Nezile ca re'en Diuzi hue yaca benë'. Lëscan' rsëdile con cabë' rna lë'ë guichi ley quie Diuzi ta inezile bi huele huele tadya'a. ¹⁹ Raquele rioñe'ele, bidzebile uzioñe'ele ben' birioñe'e. Raquele dyin quiele uzioñe'ele ben' rda lao lato lao chula. ²⁰ Raquele inezile usëdile yaca ben' birioñe'e. Raquele inezile ulu'ele yaca ben' binenezi con cabë' rna lë'ë guichi ley pca'n Diuzi lao na'a Moisés ga rguixogue'n quie yela' rioñe'e len yela' li quie Diuzi. ²¹ Chi le'e rusëdile ben' tula, ¿bixquien' birusëdile cuin? Chi le'e yëbile benë' bireya'ala' cuanle quie benë', ¿bixquien' rbanle quie benë'? ²² Chi le'e yëbile benë' bireya'ala' utilale nigula tula, ¿bixquien' rutilale nigula tula? Chi le'e ratzale ilë'ele yaca ídolo, ¿bixquien' ru'ule lu'u idao' ga rdyia yaca ídolo rbanle ta zaca' ta yu'u dumi quieyacan? ²³ Ruele dzalo inale tadya'a naca guichi ley pca'n Diuzi lao na'a Moisés, pero rutitule Diuzi biruzule di'idza' cabë' di'idza' rnën lë'ë guichi ley na'. ²⁴ Quie lena' rna lë'ë guichi ley na' cani: "Yaca ben' binaca ben' Israel, rnëbižoyaqué' quie Diuzi, pero dula' quiele rnajë' cana!."

25 Talicazi de ga huen dyin uzule tu xëdyidao' cuinle ca mandado bë Diuzi dza na', pero solamente chi hue quiele quie guichi ley pca'n Diuzi lao na'a Moisés. Porque chi bihue quiele quie guichi ley na', na' naca quiele ca quie ben' bizu xëdyidao' cuine. **26** Na' chi ruzu ben' bizu xëdyidao' cuine di'idza' quie guichi ley pca'n Diuzi lao na'a Moisés, na' hualë'ë Diuzi lëjë' ca quie ben' zu xëdyidao' cuine. **27** Pues yaca ben' bizu xëdyidao' cuine, pero ruzuyaqué' di'idza' con cabë' rna lë'ë guichi ley pca'n Diuzi lao na'a Moisés, lëjë' huachugulijë' quiele le'e, ben' biruzu di'idza' con cabë' rnan, la'acazi napale le'e guichi quie ley, la'acazi zu xëdyidao' cuinle. **28** Binaca dugalo ben' Israel yaca ben' bë'ruezi con cabë' rna Diuzi. Lëscan' binaca dugalo ben' Israel yaca ben' zu xëdyidao' cuine, pero birue quienë' xti'idza' Diuzi. **29** Na' naca dugalo ben' Israel ben' rue quie du guicho du la'adyi' ca na Diuzi. Lëscan' cati hue quiero du guicho du la'adyi'ro con cabë' rna Diuzi, lena' rulu'en dugalo nacaro ben' zu xëdyidao' cuinro. Nu ben' rue quie con cabë' rna Diuzi, rlë'ë Diuzi lëbë' ben' laxta'o yëri.

3

1 ¿Ca biži nacara tahuen quie ben' Israel ca ben' binaca ben' Israel? ¿Gaži huen dyin chi zu ben' Israel tu xëdyidao' cuinjë'? **2** Taže nacara huen quiejë', tazë rson de nacara tahuen quiejë'. Pues pca'n Diuzi di'idza' quienë' lao na'ayaqué'. **3** Tali na' bigule bala ja ben' Israel con cabë' gu'un Diuzi huejë' dza na', pero quie lena', ¿bi pensari huero? ¿Huero pensari lëscan' bihue Diuzi cabë' unanë'

huenë'? ⁴ ¡Bireya'ala' huero pensari cana'! Seguro na' hue Diuzi cabë' unanë' huenë' conforme cabë' naca tali, la'acazi chi ben' huizi' yë' yugulu ben' nita' lao yedyi layu. Lena' rguixogue'n lë'ë guichi la'iya quie Diuzi cani:

Tanun quie di'idza' rero lu'u ru'a Diuzi, banezi ja benë' naca Diuzi ben' rue tali.

Cati ilë'ëyaquë' ca rue Diuzi, na' inajë': "Diuzi naquë' ben' laxta'o yëri."

⁵ Pero chi nacan tali de que por nun quie yela' ben' mala quiero, lena' rulu'en naca Diuzi ben' huen, ¿ca bi pensari reya'ala' huero? ¿Huero pensari naca Diuzi ben' mala chi huenë' castigo nu ben' mala? (Pensari quie benë' rnia', cala pensari quie Diuzi.) ⁶ Bireya'ala' huero pensari naca Diuzi ben' mala. Chi naca Diuzi ben' mala, bide derecho quiénë' ichugulinë' ben' nita' lao yedyi layu, inanë' nu ben' bë tahuen, nu ben' bë tamala.

⁷ Lëscan' chi nacan tali de que por nun quie yela' huizi' yë' quiero, lena' rulu'en naca xti'idza' Diuzi di'idza' li, ¿bixquien' hue Diuzi castigo nu ben' huizi' yë'? ⁸ Chi tali nacan cana', ¿cala tahuen na'huero tamala tacuenda gata'tadya'a? Cana'na bala ja benë', rnajë' cana' inando' rguixogue'ndo' benë'. Pero pensari mala yu'ujë', como dan' cala cana' inando' rguixogue'ndo' benë'. Dula' quiezijë' hue Diuzi lëjë' castigo.

Napa yugulu benë' dula' xquia

⁹ ¿Ca bi pensari reya'ala' huero? ¿Huero pensari naca ben' Israel ben' dya'ara ca ben' tulá, ben' binaca ben' Israel? ¡Bisaque'! Bireya'ala' huero pensari cana', como dan' napa yugulu benë' dula' xquia, la'acazi ben' Israel, la'acazi ben' binaca

ben' Israel. Yugulujë' rnao dula' xquia quiejë' lëjë'.
 10 Cana' rguixogue'n lë'ë guichi la'iya quie Diuzi
 cani:
 Ganu ben' laxta'o yëri zu, ni tuyaquë'.
 11 Bizu ben' rioñe'e.
 Bizu ben' nuebë' Diuzi.
 12 Yuguluyaquë' rdayaquë' lao lato lao chula.
 Rnaoyaquë' neza mala ga cuiagui'yaquë'.
 Bizu ben' rue tahuen, ni tuyaquë'.
 13 Ca tu yerobá neyalon ga rla' zigo, cana' naca
 di'idza' rero lu'u ru'ayaquë'.
 Ta rzil'jë' yë' ru'elëjë' benë' di'idza'.
 Ca veneno quie bëla naca di'idza' rero lu'u
 ru'ayaquë'.
 14 Rudze'de'yaquë' laguediyayaquë', rnëjë' di'idza'
 zi'.
 15 Tariara rdayaquë' rbe'nidyiyayaquë' benë' ta
 gutiyaquë' leyaquë'.
 16 Con ga zioyaquë' rudyiagui'yaquë' benë',
 ruca'nyëchil'yaquë' laguediyayaquë'.
 17 Bineziyaquë' tzu'ulëyaquë' laguediyayaquë'
 dyë'ëdi.
 18 Ni siquiera ruejë' pensari chi hue Diuzi lëjë'
 castigo.
 19 Cana' rnën lë'ë guichi la'iya quie Diuzi. Na'ra
 ra'o neziro con cabë' rna lë'ë guichi ley pca'n
 Diuzi lao na'a Moisés dza na'te. Neziro rnabë'n
 lao ja ben' nao len cuenda biibin yaca benë' bi
 yequëbiyaquë' lao Diuzi dza gaca juicio, dza rue
 yugulu benë' cuenda lao Diuzi. 20 Pero quele por
 nun quie dan' rue quiero con cabë' rna lë'ë guichi
 ley pca'n Diuzi lao Moisés ilë'ë Diuzi ra'o ben'

laxta'o yëri. Conforme con cabë' rna lë'ë guichi ley na' neziro de dula' xquia quiero.

Ilë'ë Diuzi ra'o ben' laxta'o yëri tanun quie dan' rzudyi'ilëro Cristo

²¹ Pero na'a barioñe'ero cabë' nacan ilë'ë Diuzi ra'o ben' laxta'o yëri. Cala por nun quie chi hue quiero con cabë' rna lë'ë guichi ley pca'nnë' lao na'a Moisés ilë'ënë' ra'o ben' laxta'o yëri. Lena' rguixogue'n lë'ë guichi ley na' lente ja guichi bë ja ben' udixogue' di'idza' quie Diuzi dza na'te.

²² Tanun quie dan' rzudyi'ilëro Jesucristo, cana' ilë'ë Diuzi ra'o ben' laxta'o yëri. Ilë'ë Diuzi ben' laxta'o yëri yugulu ben' rzudyi'ilë lëbë'. Tuz ca ilë'ënë' ben' rzudyi'ilë Jesucristo, ilë'ënë' ra'o ben' laxta'o yëri, la'acazi ben' Israel, la'acazi ben' binaca ben' Israel. ²³ Yuguluro de dula' xquia quiero. Yuguluro biuzuero huero yugulu ca re'en Diuzi huero.

²⁴ Pero naca Diuzi ben' huen ilë'ënë' ra'o ben' laxta'o yëri. Bibiquizuroguë' ilë'ënë' ra'o ben' laxta'o yëri como dan' Cristo Jesús gutinë' udižuguë' quie dula' xquia quiero, cana' ru'en lato ilë'ë Diuzi ra'o ben' laxta'o yëri. ²⁵ Use'ela' Diuzi Cristo lao yedyi layu ta gutië' lë'ë yaga cruzo ta gata' yela' huenitilao quiero lao Diuzi. Tanun quie lena' huezi'ze Diuzi quie dula' xquia quie nu ben' sudyi'ilë Cristo. Cana' bë Diuzi lao na'a Cristo ta tzioñe'ero naca Diuzi ben' rue ta yu'u ni'a xnezi. Pues talicazi cabë' bë Diuzi, ulezë' bibënë' castigo quie yaca ben' bë xquia tu bineguida Cristo.

²⁶ Lëscan' bë Diuzi cana' ta tzioñe'ero biusan Diuzi huenë' ta yu'u ni'a xnezi dza quiero, dza rdaro lao yedyi layu. Pues ta yu'u ni'a xnezi neruenë', rlë'ënë' yaca ben' rzudyi'ilë Jesús ben' laxta'o yëri.

²⁷ Bireya'ala' huero cuinro ben' že tanun quie dan' rlë'ë Diuzi ra'o ben' laxta'o yëri. ¿Bixquien' bireya'ala' huero cuinro ben' že? Bireya'ala' como dan' cule quie Diuzi na' rlë'ënë' ra'o ben' laxta'o yëri, quele yela' ben' huen quiero. Rlë'ë Diuzi ra'o ben' laxta'o yëri por nun quie rzudyil'ilëro Cristo, cala por nun quie chi ruero ca mandado rue lao ley quienë' pca'nnë' lao na'a Moisés. ²⁸ Quie lena' rioñe'ero rlë'ë Diuzi ra'o ben' laxta'o yëri chi rzudyil'ilëro Cristo, cala por nun quie chi bëro, chi bibëro ca mandado rue lao ley quienë'.

²⁹ ¿Biži ca inale? ¿Inale tu cue'zi yaca ben' Israel rnabë' Diuzi? ¿Binezile rnabë'rë Diuzi lao yaca ben' binaca ben' Israel? Claro na' rnabë'cazi Diuzi lao yugulu benë'. ³⁰ Cala zë diuzi zu, tuzi Diuzi zu. Tanun quie chi rzudyil'ilëro Cristo ilë'ë Diuzi ra'o ben' laxta'o yëri, la'acazi nacaro ben' Israel, la'acazi binacaro ben' Israel. ³¹ Na'ra ¿ca bi pensari huero? ¿Huero pensari bibi zaca'ley na', como dan' rzudyil'ilëro Cristo na'a? Bireya'ala' huero pensari cana', dechan' reya'ala' huero pensari decazi ga huen dyin ley na' ta pca'n Diuzi lao na'a Moisés.

4

Ni nan cabë' di'idza' bega'nlé Diuzi Abraham

¹ ¿Ca bi pensari reya'ala' huero quie xuzista'oro Abraham? ² Chi tanun quie yela' ben' huen quienë', blë'ë Diuzi lëbë' ben' laxta'o yëri, na'ra napa Abraham derecho huenë' cuinnë' ben' že lao Diuzi. ³ ¿Ca biži rnan lë'ë guichi la'iya quie Diuzi? Pues rnan cani: “Bzudyilë Abraham Diuzi. Con lëzin blë'ë Diuzi lëbë' ben' laxta'o yëri.” ⁴ Chi

huero tu dyin, binacan cule quie xa'nro quižuguë' ra'o. Pues ta reya'ala' quižuguë' ra'o. ⁵ Pero chi rzudyi'iléro Cristo, chi por lëzin hualë'ë Diuzi ra'o ben' laxta'o yëri, lena' nacan cule bë Diuzi quiero, cala ta reya'ala' huenë' quiero. ⁶ Cana' una rey David dza na'te. Unë' cabë' redaohue benë' rlë'ë Diuzi lëbë' ben' laxta'o yëri tanun quie rzudyi'ilënë' Diuzi. Redaohue ben' babeguba Diuzi dula' xquia quie, ben' bihue Diuzi cuenda cabë' tamala bënë'. ⁷ Lena' rguixogue'n lë'ë guichi la'iya quie Diuzi cani:

Redaohue yaca benë' bezi'že Diuzi dula' xquia quie.

Redaohuejë' chi bihue Diuzi lëjë' castigo quie tamala quiejë'. ⁸ Redaohue nu ben' bihue Diuzi cuenda quie dula' xquia quie, ben' rzudyi'ilë Diuzi.

Cana' rnën lë'ë guichi la'iya quie Diuzi. ⁹ Na'ra rnaba' le'e: ¿Ca bi pensari ruele? ¿Ruele pensari huezi'že Diuzi dula' xquia quie tu cue'zi yaca ben' Israel, ben' zu xëdyidao' cuine? ¿Binezile huezi'zerë Diuzi dula' xquia quie yaca ben' tula, yaca ben' bizu xëdyidao' cuine: Neziro dyë'ëdi blë'ë Diuzi Abraham ben' laxta'o yëri tanun quie dan' bzudyi'ilënë' Diuzi. ¹⁰ ¿Bata blë'ë Diuzi Abraham ben' laxta'o yëri? ¿Blë'ënë' lëbë' ben' laxta'o yëri tu binesu xëdyidao' cuine, o cati babzu xëdyidao' cuine? Pues tu binesu xëdyidao' cuine blë'ë Diuzi lëbë' ben' laxta'o yëri. ¹¹ Pero tanëro bzudyi'ilë Abraham Diuzi, na'tera blë'ë Diuzi lëbë' ben' laxta'o yëri. Beyudyi blë'ë Diuzi lëbë' ben' laxta'o yëri, na'ra bzujë' tu xëdyidao' cuinnë' como seña de que rlë'ë Diuzi lëbë' ben' laxta'o yëri

tanun quie dan' rzudyi'ilënë' Diuzi. Quie lena' naca Abraham xuzixta'o yugulu ben' laxta'o yëri, ben' rzudyi'ilë Diuzi, ben' bizu xëdyida' cuine. **12** Lëscan' quie lena' nacarë Abraham xuzixta'o yaca ben' zu xëdyida' cuine, ben' rzudyi'ilë Diuzi cabë' bzudyi'ilë Abraham Diuzi dza na'te caora binesu xëdyida' cuinnë'.

*Tanun quie rzudyi'ilëro Diuzi, cana' uzunë'
di'idza'ca unë' huenë' quiero gacalënë' ra'o*

13 Bega'nle Diuzi Abraham len ži'isubanë' di'idza' ta yega'n quiejë' duže yedyi layu dza zaza'ra. Pero bega'nle Diuzi Abraham di'idza' tanun quie bzudyi'ilënë' Diuzi. Lena' blë'ë Diuzi Abraham ben' laxta'o yëri, cala tanun quie guichi ley pca'n Diuzi lao na'a Moisés. **14** Chi nacan tali yega'n duže yedyi layu para tu cue'zi ben' rue quie ca mandado rue lao guichi ley pca'n Diuzi lao na'a Moisés, na'ra bisaque' inaro zaca' sudyi'ilëro Diuzi, bisaque' inaro zaca' di'idza' cabë' di'idza' began'nle Diuzi Abraham. **15** Pero binacan tali cana', como dan' nusa' ley na' castigo quie yaca ben' birue quieyaquë' con cabë' rnan. Pero bigata' falta quie nu ben' binezi con cabë' rnan, na'ra birue quieyaquë'n.

16 Tanun quie bzudyi'ilë Abraham Diuzi, cana' udapa Diuzi compromiso uca'nnë' duže yedyi layu lao na'a Abraham. Cala ta quižu Abraham Diuzi uca'n Diuzi duže yedyi layu lao na'anë'. Pero bë Diuzi cana' tacuenda xela'adyi' yugulu ži'isuba Abraham de que gacacazi con cabë' una Diuzi huenë'. Cani nacan. Cala tuzi ben' nao ca mandado rue lao guichi ley udapa Diuzi compromiso,

pero lëscan' udapa Diuzi compromiso con nu ben' rzudyi'ilë Diuzi cabë' bzudyi'ilë Abraham Diuzi. Cana' pca'n Diuzi naca Abraham xuzi yugulu ben' rzudyi'ilë Diuzi. ¹⁷ Bagulecazi Abraham con cabë' rguixogue'n lë'ë guichi la'iya quie Diuzi ga una Diuzi cani: "Bapca'na' luë' xuzi yugulu ben' za' yedyi zitu', yugulu ben' rzudyi'ilë në'ëdi!". Cana' rnan lë'ë guichi. Naca Diuzi ben' useban ben' huati. Naca Diuzi ben' bzalo yugulu ta bide dza na'te.

¹⁸ La'acazi guque Abraham bigaca quienë' cabë' una Diuzi huenë' quienë', bipsannë' uzudyi'ilënë' Diuzi, ulezë' hue Diuzi quienë' cabë' unë' huenë' quienë'. Cana' guca quie Abraham naquë' "xuzi yugulu ben' za' yedyi zitu', yugulu ben' rzudyi'ilë Diuzi", conforme con ca gudyi Diuzi lëbë' dza na'te: "Gaca tazë ž'isubo!". ¹⁹ La'acazi napa Abraham cadu tu gayuhua iza, bipsannë' rbezë' gaca quië' cabë' compromiso udapalë Diuzi lëbë'. Bipsannë' rbezë' la'acazi banaquë' ben' gula, la'acazi banacarë žgulë' ben' gula. Baode tiempo quie nigula quienë' bibi'anë' xcuidi!. Baidyin hora gatiyaquë'. ²⁰ Bibënë' pensari mala, bipsannë' rbezë' gaca quienë' cabë' compromiso udapalë Diuzi lëbë'. Cana' bënë' uzudyi'ilënë' Diuzi udapë' lëbë' bala'ana. ²¹ Dyë'ëdi unezi Abraham napa Diuzi fuerza valor ta uzuë' di'idza' cabë' compromiso rapalënë' benë'. ²² Quie lena' blë'ë Diuzi Abraham ben' laxta'o yëri.

²³ Na'ra dza na'te bë Diuzi mandado bzu yaca benë' di'idza' quienë' lë'ë guichi ta rguixogue'n cabë' guca quie Abraham, bzudyi'ilënë' Diuzi blë'ë Diuzi lëbë' ben' laxta'o yëri. Pero cala para tuzi

lëbë' bë Diuzi mandado bzujë' di'idza' quiénë' lë'ë guichi. ²⁴ Lëscan' bë Diuzi mandado bzujë' di'idza' quiénë' lë'ë guichi ta ineziro ra'o hualë'ë Diuzi ra'o ben' laxta'o yëri, chi rzudyi'ilëro lëbë', ben' pseban Jesùs, ben' naca za'nro. ²⁵ Tanun quie guti Jesùs lë'ë yaga cruzo bebannë', ru'en lato yezi'že Diuzi dula' xquia quiero. Lëscan' tanun quie bebannë' ru'en lato ilë'ë Diuzi ra'o ben' laxta'o yëri.

5

Tahuen naca quiero ilë'ë Diuzi ra'o ben' laxta'o yëri

¹ Na'ra como dan' rlë'ë Diuzi ra'o ben' laxta'o yëri por nun quie rzudyi'ilëro xa'nro Jesucristo, quie lena' rbe' chizi laxta'oro lao Diuzi. ² Naca Cristo ben' sëlë ra'o lao Diuzi por nun quie dan' rzudyi'ilëro lëbë'. Quie lena' huela'iya Diuzi ra'o inaoro xnezë' du guicho du la'adyi'ro. Quie lena' redaohuero rbezaro yeyoro ga zu Diuzi guibá. ³ Lëscana' redaohuero cati raca zëdi quiero yedzagalaoro, porque neziro chi yedzagalaoro, cana' huacalë Diuzi ra'o ta suero inaoro xnezë' dyë'ëdi. ⁴ Lëscan' chi suero inaoro xnezë' dyë'ëdi, cana' yedaohue Diuzi ca ruero. Lëscan' chi yedaohue Diuzi ca ruero, cana' rbezaro dyë'ëdi yeyoro guibá ga zuë'. ⁵ Zuro contento biyehuëdiro rbezaro yeyoro guibá ga zu Diuzi como dan' use'ela' Diuzi Bichi Be quiénë', bagucalënë' ra'o ta idyë'ëro Diuzi, bayu'uro yela' nediyë'ë quie Diuzi lu'u guicho laxta'oro.

⁶ Caora cati bibi de huero ta ute uselaro cuinro lao Diuzi, na'ra bida Cristo gutinë' lë'ë yaga cruzo. Ca bdyin hora gu'un Diuzi gaca, caora na' guti

Cristo ta gažo dula' xquia quie ja ben' binuebë' Diuzi. ⁷ Nunu re'en gati lao laza ben' tula. Dere-pente ga zu benë' gue'ennë' gatië' lao laza ben' tula, ben' huen gula. ⁸ Pero bablë'ëro cabë' bë Diuzi nedyë'ënë' ra'o use'elë' ži'inë' gutië' lë'ë yaga cruzo cuenda gažo dula' xquia quiero caora cati nenacaro ben' de dula' xquia quie. ⁹ Na'ra barlë'ë Diuzi ra'o ben' laxta'o yëri tanun quie dan' guti Cristo lë'ë yaga cruzo. Lëscan' por nun quie lëbë' bihue Diuzi ra'o castigo dza gaca juicio lao yedyi layu. ¹⁰ Caora cati nenacaro enemigo quie Diuzi, na'ra uléchitz'a'o cuin Diuzi ra'o len lëbë' cuenda tzu'uléronë' tuže. Cana' bë Diuzi tanun quie dan' guti ži'inë' lë'ë yaga cruzo. Quie lena' seguro nacan yezi' Diuzi ra'o por nun quie dan' guti beban ži'inë', banacaléronë' tuže. ¹¹ Cala tuzi uléchitz'a'o Diuzi ra'o, pero lëscan' rna' ruhuianë' ra'o por nun quie ži'inë' Jesucristo. Pues lao na'a Jesucristo nacalëro Diuzi tuže rbe' chizi laxta'oro.

Ni rguixogue'n cabë'bë Adán len cabë' bë Cristo

¹² Tanun quie tuzi be'mbyu guta' dula' xquia lao yedyi layu. Na'ra como dan' guta' dula' xquia lao yedyi layu, cana' guta're yela' guti quie yugulu benë', como dan' yugulu benë' napajë' dula' xquia. ¹³ Desde dza na'te, dza bineca'n Diuzi ley quiénë' lao na'a Moisés, baquezi napa yaca ben' nita' lao yedyi layu dula' xquia. Pero uleza Diuzi bibë Diuzi leyaquë' castigo dza na'te como dan' binuca'nnë' ley quiénë'. ¹⁴ Goticazi yaca ben' unita' dza uda Adán lao yedyi layu hasta ben' unita' dza uda Moisés lao yedyi layu. Caora bdyin dza quieyaquë'

gutiyaquë' como dan' napajë' dula' xquia. Guti-caziyaquë' la' acazi netza' tamala bëyaquë' cala ca tamala bë Adán. Bibzu Adán di'idza' ca mandado bë Diuzi lëbë'.

15 Netza' ca naca ta udilo' Adán. Netza' ca naca tadya'a rue Diuzi quiero ra'o. Tanun quie ta udilo' tuzi be'mbyu Adán guta' yela' guti quie ja ben' nita' lao yedyi layu. Pero netza' cabë' bë Diuzi, bënë' quiero tu cule že. Bënë' tahuen gula quie yaca ben' nita' lao yedyi layu. Gun Diuzi ra'o yela' neban tuzioli por nun quie yela' bzu di'idza' quie tuzi be'mbyu Jesucristo. Biuquižunë' ra'o quie yela' naban gunnë' ra'o tuzioli. **16** Netza' ta udilo' Adán, binacan cabë' tadya'a rue Diuzi quiero gunnë' ra'o yela' neban tuzioli. Tanun quie ta udilo' Adán, biužaque' ilë'ë Diuzi ra'o ben' laxta'o yëri. Pero por nun quie tadya'a bë Diuzi quiero ra'o, rlë'ëñë' ra'o ben' laxta'o yëri, bezi'ženë' taže quiero ca naca dula' xquia quiero. **17** Guta' yela' guti quie yaca benë' tanun quie ta udilo' tuzi be'mbyu. Pero yaca ben' rue quie xti'idza' Diuzi, hualë'ë Diuzi leyaquë' ben' laxta'o yëri, huela'iya Diuzi leyaquë', huata' yela' neban cubi quieyaquë' por nun quie yela' bzu di'idza' quie tuzi be'mbyu Jesucristo.

18 Tanun quie ta udilo' Adán guta' tu castigo lao yuguluro. Pero tanun quie yela' bzu di'idza' quie Jesucristo, hualë'ë Diuzi yugulu ben' rue quie xti'idzë' ben' laxta'o yëri, bigata' castigo quieyaquë'. **19** Cani nacan. Tanun quie ta udilo' tuzi be'mbyu, blë'ë Diuzi yuguluro ben' napa dula' xquia. Pero tanun quie yela' bzu di'idza' quie tuzi be'mbyu, rlë'ë Diuzi ra'o ben' binapa dula' xquia.

20 Udixu Diuzi ley quienë' lao yedyi layu ta ulu'en lega napajë' xquia. Pero tu yu'uyaqué' rueyaqué' xquia že, lëscan' beyëchi'la'adyi' Diuzi leyaqué' taže. **21** Cani nacan. Tanun quie dula' xquia napa yaca benë', quie lena' guta' yela' guti quiejë'. Pero lëscan' tanun quie yela' ben' huen quie Diuzi, quie lena' guta' ilë'ënë' ra'o ben'laxta'o yëri, hue'në' ra'o yela' neban tuzioli por nun quie Señor quiero Jesucristo.

6

Bira gacaro pensari huero tamala, reya'ala' gacaro pensari gaparo Cristo bala'ana

1 ¿Ca bi pensari reya'ala' huero? **2** ¿Huero pensari huero tamala cuenda ulu'e Diuzi ra'o ca naca yela' ben' huen quienë' ina'në' ra'o nacala gaca quiero? ¡Bireya'ala' huero pensari cana! Naca quiero ca quie ben' baguti, bira rnabë' dula' xquia quiero ra'o. ¿Cómo pues huero seguir huero xquia? **3** ¿Binezile ca guca quiero dza gucaro bautismo? ¿Binezile gucaro bautismo ta ulu'en banacalëro Cristo Jesús tuže, lëscan' ta ulu'en banaca quiero ca quie ben' guti lë'ë yaga cruzo? **4** Tanun quie gucaro bautismo naca quiero ca quie ben' baguti, ben' bade lu'u yerobá conlë Cristo. Pero lëscan' naca quiero ca quie ben' babeban, ben' bade yela' neban cubi quie. Naca quiero ca quie ben' beban cabë' beban Cristo, bebannë' lao na'a Diuzi, ben' de yela' huaca quie.

5 Porque chi tanun quie yela' guti quie Cristo naca quiero ca quie ben' huati, na' nacalëro lëbë' tuže, lëscan' tanun quie yela' beban quie Cristo

naca quiero ca quie ben' beban, na' lëscan' quie lena' nacalëronë' tuže. ⁶ Caora guti Cristo lë'ë yaga cruzo, caora na' guca quiero ca quie gutirë pensari mala quiero cuenda bira huero ta rnazin quiero, bira inabë' pensari mala ra'o, bira ru'en lato huero mandado ca mandado rue pensari mala quiero ra'o. ⁷ Porque bira saque' inao benë' pensari mala quieyaquë' cati bagutiyaquë'. ⁸ Chi tali apsanro tamala quiero, lena' rulu'en anaca quiero ca quie ben' bagutilë Cristo. Cana' xela'adyi'ro huazulëro lëbë' tuzioli. ⁹ Porque neziro caora beyudyi guti beban Cristo, na'ra tuzioli bira gatinë'. Bira saque' hue yela' guti lëbë' gan tatula. ¹⁰ Caora guti Cristo lë'ë yaga cruzo, para tuzioli udižuguë' quie dula' xquia quiero. Na'ra nabannë' zuë' guibá naquë' ben' bala'ana že lao Diuzi. ¹¹ Na'ra quie le'e, bira gacale pensari huele tamala, reya'ala' gacale pensari gapale Diuzi bala'ana como dan' nacalële Cristo Jesús, ben' naca Señor quiero, tuže.

¹² Quie lena' bihue'le lato inabë' pensari mala quiele le'e huele ca tamala rnan guicho laxta'ole huele. ¹³ Bihue'le lato huelële cuerpo quiele tamala. Ta reya'ala' huele, huelële Diuzi tuže como dan' banaca quiele ca quie ben' baguti, ben' beban lao na'anë'. Ta reya'ala' huele, hue'le lato huelële cuerpo quiele tadya'a. ¹⁴ Porque bira saque' inabë' pensari mala quiele le'e. Bira nadale cuenda lao na'a ley pca'n Diuzi lao na'a Moisés, nadale cuenda lao na'a yela' reyëchi'la'adyi' quie Diuzi.

Ni rguixogue'n tu di'idza' cabë' naca quie ben' zu

lao xa'ne

¹⁵ ¿Na'ra biži huero? ¿Huero xquia como dan' bira nadero cuenda lao na'a ley pca'n Diuzi lao na'a Moisés, dechan' nadero cuenda lao na'a yela' reyëchi'la'adyi' quie Diuzi? ¡Bisaque' huero can'!

¹⁶ Pero dyë'ëdi nezile cabë' naca quie nu ben' zu lao xa'ne. Re'en ca re'enna uzujë' di'idza' ca mandado rue xa'ne. Cana' naca quiero. Chi uzuro di'idza' cabë' mandado rue pensari mala quiero, lena' udyiagui'n ra'o, biyezi' Diuzi ra'o gunnë' yela' nabán quiero tuzioli. Chi uzuro di'idza' ca mandado rue Diuzi, lena' gacalën ra'o yezi' Diuzi ra'o gunnë' yela' nabán quiero tuzioli.

¹⁷ Pero xcale Diuzi, bira rzule di'idza' ca mandado rue pensari mala quiele, cabë' bële dza na'te. Pero na'a baruzule di'idza' du guicho du la'adyi'le ca mandado rue xti'idza' Diuzi ta pca'nnë' laohuele.

¹⁸ Banacale ben' libre ta huele tadya'a inaole xneza Diuzi.

¹⁹ (Tanun quie dan' binetzioñ'e'ele dyë'ëdi cabë' rnia' le'e, lena' rnia' le'e itu chopá la'ana ta gacalën le'e.) Cani nacan. Cabë' bële dza na' ulisa ni'a na'ale bële tamala, bële ta bireya'ala' huele, cana' hualisa ni'a na'ale huele tadya'a, huele ta reya'ala' huele, tacuenda talicazi nacale ben' quie Diuzi.

²⁰ Caora neyu'ule pensari mala dza na', unabë'n le'e ca xa'nle, quie lena' bibzule pensari huele tahuen ca tahuen re'en Diuzi huele.

²¹ ¿Pero biži bële gan unaole neza mala? Na'ra lena' ruen yela' stu' quiele. Zë'lao ituzi yela' guti ulezale yebole lao gui' gabila.

²² Pero na'a bira yu'ule pensari mala inabë'n le'e ca xa'nle. Baoyu'ule pensari quie Diuzi ta huele tahuen ca re'en Diuzi huele.

Cana' sí huele gan. Cana' talicazi nacale ben' quie Diuzi. Ze'lao cana' gun Diuzi yela' neban ta biyeyudyi yedu quie. ²³ Ga yeudyi gažo dula' xquia quiero yeyoro lao gui' gabilia. Pero netza' quie Diuzi gunnë' yela' neban quiero tuzioli tanun quie nacaléro Cristo Jesús, ben' naca Señor quiero, tuže.

7

Ni rguixogue'n tu di'idza' cabë' naca quie tu nigula bazulë be'mbyu

¹ Bicha', le'e nuebë'le nezile bi nan lë'ë guichi ley pca'n Diuzi lao na'a Moisés. Nezile rnabë' guichi ley na' ra'o solamente dza nebanro rdaro lao yedyi layu. ² Rnia' le'e tu di'idza'. Cani nacan quie tu nigula bazulë be'mbyu. Biru'e guichi ley na' lato usan nigula be'mbyu quië' tu nenebannë' nerda be'mbyu quië' lao yedyi layu. Pero chi baguti be'mbyu quië', anaquë' libre yezi'në' ben' tula. Bira naca quië' be'mbyu na' lao guichi ley. ³ Quie lena' chi baptilë' be'mbyu tula tu neneban be'mbyu quië', na'ra xquia ruenë' quiénë'. Pero chi baguti be'mbyu quië', anaquë' libre yezi'në' ben' tula, bira naca quië' be'mbyu na' lao guichi ley. Bibi dula' xquia de quiénë'.

⁴ Lëscan' cana' nacan quiele, bicha'. Le'e banacaléle Cristo tuže. Banaca quiele ca quie nigula baguti xquiuhue. Bira nacale cuenda lao guichi ley pca'n Diuzi lao na'a Moisés. Banacale cuenda quie Cristo, ben' baguti beban. Cana' naca quiero nacaro ladyina'a Diuzi. ⁵ Na'ra cabë' guca quiero dza na'te, bëro ta rnazin quiero. Unan quiero huero ta biru'en lato huero lë'ë guichi ley pca'n

Diuzi lao na'a Moisés. Tanun quie biru'en lato huero bi cosa lë'ë guichi ley na', lena' unan quiero uchisa ni'a na'aro huero tamala.⁶ Pero bira inabë' guichi ley pca'n Diuzi lao na'a Moisés ra'o. Nacaro libre huero ca re'en Diuzi huero, bayu'uro pensari quienë' ta yecubinë' pensari quiero. Bira naca quie guichi ley na' para inabë'n ra'o.

Ni rguixogue'n quie pensari mala yu'u lu'u guicho laxta'oro

⁷ Na'ra, ¿ca biži inaro? ¿Inaro naca guichi ley na' tamala? ¡Bireya'ala' inaro cana' como dan' binaca guichi ley na' tamala! Pero rguixogue'cazin ra'o cabë' naca tamala. Ni siquiera binezida' tamala na' rza'la'adyi'ro ta de quie laguedyiro, chi birmixogue'n lë'ë guichi ley na' de que: "Bireya'ala' sa'la'adyi'ro ta de quie laguedyiro."⁸ Pero tanun quie rguixogue' guichi ley na' cabë' bireya'ala' huero, quie lena' uzulao pensari mala quia' huen në'ëdi' mandado hua' ta rnazin quia'. Porque según cabë' rguixogue' lë'ë guichi ley na', cana' ineziro bi huero huero tamala, bi huero huero tahuen.⁹ Guca tu ta guca tiempo biunezda' cabë' rguixogue'n lë'ë guichi ley na'. Quie lena' biunezda' de dula' xquia quia'. Pero caora bdyin hora unezda' cabë' rguixogue'n lë'ë guichi ley na', caora na' za' pensari mala quia', bëlén në'ëdi' ta hua' ta biru'en lato hua'. Caora na' unezda' de dula' xquia quia', huaca hue Diuzi në'ëdi' castigo.¹⁰ Ulëchi Diuzi guichi ley quienë' ta gacalënë' yaca ben' nita' lao yedyi layu cuenda suyaquë' contento. Pero por tu parte quia' në'ëdi', lao na'a Diuzi unezda' de dula' xquia quia', huen žudyi huenë' në'ëdi' castigo. Cana' guca quia'.¹¹ Tanun quie

guichi ley na', aoži' pensari mala quia' në'ëdi' yë'. Cana' guta' dula' xquia quia', bën žudyi hue Diuzi në'ëdi' castigo.

¹² Pero naca la'iya guichi ley pca'n Diuzi lao na'a Moisés. Naca la'iyan, nacan li, nacan huen ca mandado rue lao guichi ley na'. ¹³ Na' inaba' le'e tu pregunta, ¿naca dula' quie guichi ley na' guta' dula' xquia quia', huen žudyi hue Diuzi në'ëdi' castigo? ¡Binacan cana'! Binaca dula' quie guichi ley na', nechan' dula' quie dula' xquia quia'. Conlë ta naca tadya'a uži' dula' xquia quia' në'ëdi' yë'. Cana' naca dyin quie guichi ley quie Diuzi. Nacan ta ulu'en ra'o ca tamala gula naca dula' xquia quiero.

¹⁴ Neziro nusa'a guichi ley na' pensari quie Diuzi, pero në'ëdi' biyu'a pensari quie Diuzi, yu'a pensari mala ca pensari yu'u yaca ben' nita' lao yedyi layu. ¹⁵ Binezda' bi ruen quia'. Tu ta bireya'ala' hua', lëlena' rua', la'acazi nezda'tamala na'. ¹⁶ Pero chi rua' tu ta bireya'ala' hua', lena' rulu'en nezda' naca dya'a guichi ley quie Diuzi. ¹⁷ Pensari mala quia' yu'u lu'u guicho laxta'ohua', lena' rnabë'n në'ëdi' hua' tamala. Raca quia' ca quie ben' tula, ben' mala, rnabë'në' në'ëdi'. ¹⁸ Nezda' ca naca pensari yu'a në'ëdi'. Biyu'a pensari dya'a ca pensari quie Diuzi. Yu'a pensari mala ca pensari yu'u yaca ben' nita' lao yedyi layu. Rnëen lu'u guicho laxta'ohua' hua' tahuen, pero bigaca' hua'n. ¹⁹ Birua'tadya'a cabë' re'enda' hua', nechan' tamalala rua', ta bire'enda' hua'. ²⁰ Na'ra chi birua' tadya'a cabë' re'enda' hua', lena' ulu'en rnabë'n pensari mala quia' në'ëdi'. Raca quia' ca quie ben' tula, ben' mala rnabë'në' në'ëdi'. ²¹ Cana'naca ta raca quia'. Cati ruzua'

pensari hua' tahuen, cana' reyudyi quia' tamalala rua'. ²² Nezicazida' naca huen guichi ley quie Diuzi. ²³ Pero lëscan' nezda' ca naca pensari yu'u lu'u guicho laxta'ohua', yu'un pensari mala ca pensari yu'u yaca ben' nita' lao yedyi layu. Na'ra bire'en pensari mala quia' hua' tahuen cabë' re'enda' hua'. Cana' rnabë'n pensari mala quia' në'ëdi'. Raca quia' ca quie ben' yu'u lu'u dyiguiba, ben' binaca libre.

²⁴ ¡Bayëchi' gula raca quia!! ¿Nuži gacalë në'ëdi' usana' pensari mala yu'u lu'u guicho laxta'ohua', pensari re'en udyagui'n në'ëdi'? ²⁵ Tuzi Diuzi gacalënë' në'ëdi' lao na'a ži'inë' Jesucristo, ben' naca Señor quiero. ¡Xcale Diuzi taže bagucalënë' në'ëdi' como cabë' guca quia', gu'unda' hua' mandado ca mandado rue lao guichi ley quie Diuzi, pero biguca' como dan' unabë'n pensari mala quia' në'ëdi'. Unabë'n në'ëdi' cabë' rnabë' ben' naca xa'n tamala.

8

Racalë pensari quie Diuzi yu'u lu'u guicho laxta'oro ra'o

¹ Na'ra bigata' castigo quie ben' nacalë Cristo Jesús tuže. Bira inabë' pensari mala ra'o ca pensari mala yu'u lu'u guicho laxta'o yaca ben' nita' lao yedyi layu, nechan' inabë'cazi pensari quie Diuzi yu'u lu'u guicho laxta'oro ra'o. ² Dyin quie pensari quie Bichi Be quie Diuzi yu'u lu'u guicho laxta'oro, lena' uselan ra'o gacaro libre. Birabi dula' xquia quiero gata' lao Diuzi huenë' ra'o castigo. Lëscan' dyin quie pensari quie Diuzi gata' yela' neban quiero tuzioli tanun quie dan'

nacalëro Cristo Jesús tuže. ³ Porque bë Diuzi gan bënë' ta biužaque' hue guichi ley pca'nnë' lao na'a Moisés. Tanun quie pensari mala yu'u lu'u guicho laxta'oro, biužaque' yeguba guichi ley na' dula' xquia quiero. Quie lena', use'ela' Diuzi ži'inë' ta yegubë' dula' xquia quiero. Guquë' be'mbyu ca ra'o, ben' de dula' xquia quie, pero lëbë' bibi dula' xquia quië' de. Cana' bë Diuzi use'ela'në' ži'inë' gutinë' lao lazaro guquë' ca gun hue'ro Diuzi ta yeži dula' xquia quiero. Na' biži lao na'a ži'inë' guquë' be'mbyu bidë' lao yedyi layu, bënë' gan begubë' dula' xquia quiero ta bira inabë'n ra'o. ⁴ Cana' bë Diuzi gucalënë' ra'o tacuenda huero tadya'a con cabë' rnan lë'ë guichi ley quienë'. Bira inaoro huero ca naca pensari mala yu'u lu'u guicho laxta'oro ra'o, ben' de dula' xquia quie. Pero inaoro huero ca naca pensari quie Bichi Be quie Diuzi yu'u lu'u guicho laxta'oro.

⁵ Yaca ben' nao ca naca pensari mala yu'u lu'u guicho laxta'ojë', lega raxeyaqué' huejë' ta rnazin quiejë'. Pero yaca ben' nao ca naca pensari quie Bichi Be quie Diuzi yu'u lu'u guicho laxta'ojë', lega raxejë' uzujë' di'idza' ca mandado rue Diuzi. ⁶ Chi inaoro huero ca naca pensari mala yu'u lu'u guicho laxta'oro, lena' udyiagui'n ra'o lao Diuzi. Pero chi inaoro huero ca naca pensari quie Bichi Be quie Diuzi yu'u lu'u guicho laxta'oro, lena' gata' yela' neban quiero biyeyudyi yedu quie, huabe' chizi laxta'oro. ⁷ Naca enemigo quie Diuzi yaca ben' nao rue pensari mala ca pensari mala yu'u lu'u guicho laxta'ojë'. Nica re'enjë', nica nezijë' bi huejë' ta huejë' mandado ca mandado rue lao guichi ley quie Diuzi. ⁸ Yaca ben' raxe hue pensari

mala ca pensari mala yu'u lu'u guicho laxta'ojë', biilë'ë Diuzi lëjë' gusto cabë' rueyaquë'.

⁹ Pero le'e binacale ben' nao rue pensari mala ca pensari mala yu'u lu'u guicho laxta'o yaca ben' nita' lao yedyi layu. Nacale ben' nao rue pensari quie Bichi Be quie Diuzi, como dan' yu'u pensari quië' lu'u guicho laxta'ole. Nu ben' biyu'u pensari quie Cristo lu'u guicho laxta'ohue, binaquë' ben' quie Cristo. ¹⁰ Chi nacalëro Cristo tuže, la'acazi gati cuerpo quiero tanun quie dula' xquia quiero, pero ca naca quie bichi be quiero, bigatin nabannan como dan' nacalëro Cristo tuže rlë'ë Diuzi ra'o ben' bira de dula' xquia quie. ¹¹ Quie lena' chi tali yu'uro pensari quie Bichi Be quie Diuzi lu'u guicho laxta'oro, la'acazi gatiro, useban Diuzi ra'o gunnë' yela' neban cubi ta biyeyudyi yedu quie. Na' Diuzi, ben' pseban Cristo Jesús, lëlëbë' usebannë' ra'o lao na'a Bichi Be quienë', ben' yu'u lu'u guicho laxta'oro.

¹² Cani nacan bicha', nacaro obligado, pero binacaro obligado huero inaoro con cabë' rna pensari mala yu'u lu'u guicho laxta'oro. ¹³ Porque chi huero inaoro ca rue pensari mala yu'u lu'u guicho laxta'oro, na'ra bë' gatiro, bigata' yela' neban tuzioli quiero. Pero chi hue quiero con cabë' rna Bichi Be quie Diuzi, chi bihuero cuenda con cabë' rna pensari mala yu'u lu'u guicho laxta'oro, na'ra bë' gatiro, huata' yela' neban quiero tuzioli.

¹⁴ Naca ži'i Diuzi yugulu ben' nao ruzu di'idza' con cabë' rna Bichi Be quienë'. ¹⁵ Ca naca pensari bdze' Diuzi lu'u guicho laxta'oro, binacan pensari ta idzebiro ca idzebi ben' zu lao xa'n tamala. Pero tanun quie pensari quië' yu'un lu'u guicho

laxta'oro, nacaro ži'inë', na' yëbironë': "Xuza' Diuzi." ¹⁶ Racalë pensari quie Bichi Be quie Diuzi pensari quiero ta xela'adyi'ro nacaro ži'i Diuzi. ¹⁷ Dan' nacaro ži'i Diuzi, cana' gunnë' ra'o ca ta unë' gunnë' ra'o dza na'te. Conlë Cristo gata' yela' neban quiero tzesulëronë' tuzioli. Na' chi raca zëdi quiero dza rdaro lao yedyi layu tanun quie naoro xneza Cristo, lëscan' huadyin dza yedyinro guibá tzahuero tuže len Cristo.

¹⁸ Taže tazëdi de quiero dza rdaro lao yedyi layu tanun quie dan' naoro xneza Cristo, pero cati abedyinro guibá inaro tadao' bicu' tazëdi guca quiero. Inaro nacara tahuen gula gaca quiero cati bedyinro guibá. ¹⁹ Yugulu ta udixu Diuzi lao yedyi layu rbezan dza yedupa yedzaga yugulu ben' naca ži'i Diuzi guibá. ²⁰ Yugulu ta udixu Diuzi lao yedyi layu naca bayëchi' quién, pero cala dula' quién naca bayëchi' quién. Dyin bë Diuzi naca bayëchi' quién, pero bzucazi Diuzi dza, dza yecubinë' yeyuenë' yugulu ta de lao yedyi layu. ²¹ Huadyin dza yeži yeyëri yugulu ta udixu Diuzi lao yedyi layu. Bira gaca bayëchi' quién, bira yedzagalaona. Huega'n tzao'na dza zuro guibá nacaro libre ra'o, ben' naca ži'i Diuzi. Lëdza na' yega'n dya'a gula quiero. ²² Neziro redzagalaao yugulu ta udixu Diuzi lao yedyi layu ca quie redzagalaao nu nigula re'en gallo xcuidi' quie. ²³ Cala tuzi ta udixu Diuzi lao yedyi layu redzagalaona, pero lëscan' ra'o, ben' nao xnezë', redzagalaoro la'acazi yu'u pensari quie Bichi Be quie Diuzi lu'u guicho laxta'oro. Bablé'ëro tadya'a na' yu'uro pensari quie Bichi Be quie Diuzi. Neziro huadyin dza inabë' puro pensari quie Bichi Be quie Diuzi

ra'o, bira inabë' pensari quiero ra'o. Lega rbezaro dza yezi' Diuzi ra'o nacaro ū'iñë' sulëronë' naquë' Xuziro. Na' dza na' yecubi Diuzi cuerpo quiero ta iyacan cuerpo dya'atzegue, cuerpo bicuiagui'n. ²⁴ Lëdza na' rbezaro gaca quiero con cabë' una Diuzi gaca quiero tanun quie batpte pselanë' ra'o. Chan' baguca quiero tu ta ulezaro gaca quiero, na'ra bira zu cuezaro gaca quiero. ²⁵ Pero chi binegaca quiero tu ta cuezaro gaca quiero, na'ra ruen zi cuezaro dyë'ëdi idyin dza gaca quiero cabë' rbezaro gaca.

²⁶ Lëscan' racalë pensari quie Bichi Be quie Diuzi ra'o ga racaro falta. Nica neziro hue'lëro Diuzi di'idza' ca reya'ala' huero. Pero ca pensari quie Bichi Be quie Diuzi yu'u lu'u guicho laxta'oro, con len racalën ra'o ulidzaro Diuzi cabë' reya'ala' ulidzaronë' nun quie dan' biredzelero bi di'idza' yëbironë'. ²⁷ Rezi' Diuzi cuenda ca naca pensari yu'u lu'u guicho laxta'oro. Nezi Diuzi bi na Bichi Be quienë', porque rulidza Bichi Be quienë' lëbë' conforme ca re'en Diuzi gaca quie yaca ben' quienë', yaca ben' nao xnezë'.

Con bitezi tazëdi gaca quiero huero gan

²⁸ Neziro con bitezi gaca quiero, huacalë Diuzi ra'o yega'nro huen, ra'o, ben' dyë'ë Diuzi, ra'o, ben' ulionë' segün ca unanë' huenë' quiero dza na'te. ²⁹ Desde dza na'te nezi Diuzi huadyin dza sudyi'ilëronë'. Cana' psere Diuzi ra'o dza na'te ta yedyinro iyacaro ta gacaro cabë' naca ū'iñë' Cristo. Cana' yedyin Cristo naquë' ben' belaora lao yaca ben'rudyi'ilë Diuzi. ³⁰ Na'ra como psere Diuzi ra'o dza na'te ta gacaro ben' quienë', lëscan'

uliorënë' ra'o ta huero mandado quienë'. Na'ra como ulionë' ra'o huero mandado quienë', lëscan' pca'nrenë' ra'o ben' laxta'o yëri. Na'ra como pca'nnë' ra'o ben' laxta'o yëri, lëscan' bërënë' ra'o ben' bala'ana, ben' inita'lë lëbë' guibá.

³¹ Quie lena', ¿ca bi pensari reya'ala' huero? Pues como zu Diuzi racalënë' ra'o, nunu gaca udyiagui' ra'o. ³² Na'ra como bibeguë' Diuzi guida žil'inë', pero use'ela'cazine' lëbë' lao yedyi layu ta gutië' lë'ë yaga cruzo lao lazaro, lëscan' biyeguë' Diuzi gunnë' ra'o yugulu tahuen ta rdzioguero nuzue' žil'inë' Jesucristo ta gacalënë' ra'o. ³³ ¿Nuži napa derecho gao ra'o xquia, ra'o, ben' ulio Diuzi? Naca cuin Diuzi ben' pca'n ra'o ben' laxta'o yëri. ³⁴ ¿Nuži napa derecho ichuguli quiero gacaro castigo? Naca cuin Cristo ben' guti lë'ë yaga cruzo pseban Diuzi lëbë', zuë' cuëta lë'ënë' zaqué' yebë, rulidzë' lëbë' por ra'o. ³⁵ Con bitezi gaca quiero biyeyudyi yedu nadyë'ë Cristo ra'o. La'acazi redzagalaoro, la'acazi raca zëdi quiero, la'acazi ruelëjë' ra'o bizinaquezi, la'acazi bide ta gaoro, la'acazi bide žaba quiero, la'acazi naca žudyi quiero, la'acazi ruzegadyijë' gutijë' ra'o, biyeyudyi yedu nadyë'ë Cristo ra'o. ³⁶ Rguixogue'n lë'ë guichi la'iya quie Diuzi ca tazëdi gaca quiero cani:

Tanun quie rdza' yaca benë' dan' naoro xneza
Diuzi, cana' re'enjë' gutijë' ra'o.

Ca ruti ja benë' beco' ži'ilä' yugu dza, cana' re'enjë'
gutijë' ra'o.

Cana' rnëñ lë'ë guichi la'iya. ³⁷ Na'rnia' le'e,
con bitezi tazëdi za' gaca quiero, huero gan
como dan' zu Cristo napë' ra'o cuidado nadyë'ënë'

ra'o. ³⁸ Nezda' dyë'ëdi con bitezi za' gaca quiero, biyeyudyi yedu nadyë'ë Diuzi ra'o. La'acazi guti benë' ra'o, la'acazi gaca zëdi quiero dza rdaro lao yedyi layu, la'acazi rue yaca ángel condre ra'o, la'acazi ruelë yaca taxi'ibi' ra'o bizinaquezi, la'acazi bi raca quiero na'a, la'acazi bi raca quiero uxe huidzo, ³⁹ la'acazi bi raca quiero guibá, la'acazi bi raca quiero lao yedyi layu, la'acazi nuti'tezi za' huelë ra'o bizinaquezi, biusanla'adyi' Diuzi ra'o, biyeyudyi yedu nadyë'ënë' ra'o como dan' nacalëro Cristo Jesús, ben' naca Señor quiero, tuže.

9

Ulio Diuzi ben' Israel dza na'te

¹ Tali rnia' le'e, como naca' ben' quie Cristo, quele yë' rzi'a. Cabë' rnia' le'e nacan tali, como dan' yu'u pensari quie Bichi Be quie Diuzi lu'u guicho laxta'ohua'. ² Lega rdëbida' quie ben' yedyi quia!. Lega raca bayëchi' lu'u guicho laxta'ohua' por lëjë!. ³ Zua' dispuesto udze'de' Diuzi në'ëdi', zua' dispuesto usanla'adyi' Cristo në'ëdi', zua' dispuesto bi ta gaca quia!, chan' gaca tahuen quie yaca ben' yedyi quia!. ⁴ Nacajë' ben' Israel, ben' naca ži'isuba xuzixta'ohua' Jacob. Rlë'ë Diuzi leyaquë' ca quie ži'inë!. Uzulë Diuzi leyaquë' dza na'te, blu'enë' leyaquë' yela' huaca quië'. Udixogue'në' leyaquë' ca unanë' huenë' quiejë'. Pca'nnë' guichi ley quienë' lao na'a laguedyijë' Moisés. Gudyinë' lëjë' ca reya'ala' huejë' ta tzionla'adyi'jë' lëbë!. Yega'nlënë' leyaquë' di'idza' ca huenë' gacalënë' leyaquë!. ⁵ Nacajë' ži'isuba yaca xuzixta'ohua', ben' unita' dza na'. Caora bida

Cristo, ben' use'ela' Diuzi, guquë' be'mbyu naquë' ū'iisuba yaca ben' Israel. Lëbë' naquë' Diuzi, ben' rnabë' lao yugulute. Naquë' ben' la'iya tuzioli. Amén.

⁶ Pero quele inia' biuzu Diuzi di'idza' ca di'idza' bega'nllenë' ben' Israel. Cala yugulu ben' Israel nacajë' dugalo ben' quie Diuzi. ⁷ Lëscan' cala yugulu ben' Israel nacayaquë' dugalo ū'iisuba xuzixta'ohua' Abraham segün ca naca di'idza' bega'nle Diuzi Abraham, porque una Diuzi rëbinë' Abraham: "Lao na'a ū'iloi Isaac huanita' dugalo ū'iisubo!" ⁸ Quie lena' reya'ala' tzioñe'ero cala yugulu ben' Israel nacayaquë' dugalo ben' quie Diuzi. Balazi ben' Israel, ben' rue quie xti'idza' Diuzi, leyaquë' nacayaquë' dugalo ben' quie Diuzi, dugalo ben' ū'iisuba Abraham. ⁹ Porque cani naca di'idza' bega'nle Diuzi Abraham: "Caora babedyin hora, huedena'a luë' huela'iya' žgulo' Sara cuenda hua'anë' xcuidi' quio!." Cana' tzioñe'ero naca ben' rue quie xti'idza' Diuzi dugalo ben' quie Diuzi como dan' naca quieyaquë' ca quie Isaac, ben' golo de acuerdo con cabë' di'idza' bega'nle Diuzi Abraham. ¹⁰⁻¹³ Dera mazara di'idza' re'enda' inia' le'e. Caora babgula Isaac, na' bi'a nigula quië' Rebeca xcuidi' guidi'. Na'ra una Diuzi rëbinë' nigula quië Isaac: "Huanabë' bidao' galo taorupe lao bidao' golo tanëro." Lena' naca de acuerdo con ca una Diuzi cani: "Huela'iya' Jacob, pero bihuela'iya' Esaú." Cana' una Diuzi la'acazi bine-galo yaca xcuidi' guidi', binehuejabi'tahuen, bine-huejabi'tamala. Lena'ineziro napa Diuzi derecho huela'iyanë' nu ben' re'ennë' huela'iyanë', biru-enë' cuenda la'acazi bëjë' tahuen, la'acazi bëjë'

tamala.

¹⁴ ¿Biži inaro chi'? ¿Inaro birue Diuzi tadya'a? ¡Bireya'ala' inaro birue Diuzi tadya'a!

¹⁵ Porque cani una Diuzi rëbinë' Moisés dza na'te: "Hueyëchi'la'adya' nu ben're'enda' yejëchi'la'adya'. Idyë'ëda' nu ben' re'enda' idyë'ëda'." ¹⁶ Quie lena' inia' le'e, cala ra'o huero mandado yejëchi'la'adyi' Diuzi ra'o, nechan' segün ca mandado hue cuinnë' yejëchi'la'adyi'në' ra'o. ¹⁷ Lë'ë guichi la'iya quie Diuzi rguixogue'n ra'o cabë' una Diuzi gudyinë' ben' naca rey quie nación Egipto dza na'. Cani una Diuzi rëbinë' lëbë': "Baolioga' luë' gaco' rey ta ilë'ë yugulu benë' ca naca yela' huaca quia', lëscan' ta huebë'jë' në'ëdi' duže yedyi layu." ¹⁸ Quie lena' inia' le'e, cani naca quie Diuzi: Reyëchi'la'adyi'në' nu ben' re'ennë' yejëchi'la'adyi'në'. Lëscan' usanla'adyi'në' nu ben' re'ennë' usanla'adyi'në'.

¹⁹ Pero le'e inale: "Chi yugulu ta ruero nacan mandado quie Diuzi, na'ra ¿bixquien' rugapa Diuzi ra'o dula' xquia por nun quie ta ruero rdaro lao yedyi layu? ¿Tu ta re'en Diuzi gaca, biži huero ta bigacan?" ²⁰ Pero rnaba' le'e, ¿nuži nacaro tzu'uro huedila huenë lëro Diuzi? Rnia' le'e, binapa tu yeso' derecho inën yëbin ben' rue len: "¿Biquien' bzalolo' në'ëdi' cani?" ²¹ Pues napa ben' rue yeso' derecho si'në' gun', huenë' bitezi yeso' rapanë' gusto huenë'. Con tuzi gun' senë' napë' derecho huenë' yeso' tzao', o huenë' yeso' corriente.

²² Napa Diuzi derecho idza'në' huenë' castigo nu ben' reya'ala' gata' castigo quie como dyë'ëdi rbeza Diuzi yetza'jë' pensari quiejë'. ²³ Cana' bë Diuzi, dyë'ëdi ulezanë' quie yaca ben' unita' dza

na'. Cana' blu'enë' ra'o naquë' ben' žela'adyi', ben' reyëchi'la'adyi' ra'o. Desde dza na'te zuë' rbezë' ta udze'në' xnezi quiero tacuenda idyin dza tzsulëronë' guibá. ²⁴ Ulio Diuzi ra'o lao rupa cue'ro len ben' Israel len ben' za' yedyi tula. ²⁵ Lëcana' rguixogue'n lë'ë guichi la'iya quie Diuzi ta bë ben' lao Oseas:

Huabio Diuzi yaca ben' za' yedyi tula ta gacajë' ben' quiénë'.

Huadyë'ë Diuzi yaca ben' binaca ben' Israel, ben' nunu nadyë'ë.

²⁶ Lëscan' lëyaca yedyi ga nita' ben' binuebë' Diuzi, ga una Diuzi: "Binacale ben' quia!"

Lëben' na' iyacajë' ū'i Diuzi, ben' neban tuzioli.

²⁷ Pero quie ben' Israel una Isaías caora unë' cani: "La'acazi naca ben' Israel tazëgula ca naca yožo de ru'a nisadao', quele yugojë' inaojë' xneza Diuzi, tu chopazijë' inaojë' xneza Diuzi ute usela Diuzi lëjë'. ²⁸ Tu sasazi uzu Diuzi di'idza' quiénë' huenë' castigo lao duže yedyi layu." ²⁹ Lëscan' dza na'te unë Isaías cani:

Chi bipca'n Diuzi ū'iisubaro lao yedyi layu dza na', babega'nnan bayëchi' gula quiero cabë' bayëchi' gula bega'nnan quie ben' yedyi Sodoma len ben' yedyi Gomorra.

Cabë' naca quie yaca ben' Israel

³⁰ ¿Ca bi pensari reya'ala' huero? Pues reya'ala' huero pensari de que yaca ben' binaca ben' Israel, ben' birnao guichi ley pca'n Diuzi lao na'a Moisés, pues baguca quiejë' rlë'ë Diuzi lëjë' ben' laxta'o yëri nun quie na' rzudyi'ilëjë' Jesús. ³¹ Pero netza'n quie ben' Israel. Nernaojë' guichi ley

pca'n Diuzi lao na'a Moisés tacuenda ilë'ë Diuzi leyaquë' ben' laxta'o yëri. Chan' dula'adyi'yaquë' ruzujë' di'idza' huejë' yugulu ca mandado rue lao guichi ley na', na'ra ilë'ë Diuzi leyaquë' ben' laxta'o yëri. Pero bibëyaquë' gan, bibzujë' di'idza' huejë' yugulu con cabë' rna lë'ë quichi ley na'. Quie lena' bibëjë' gan ilë'ë Diuzi lëjë' ben' laxta'o yëri. ³² ¿Bixquién' bibëjë' gan? Pues bibëjë' gan como dan' re'enjë' huejë' cuinzijë' ben' laxta'o yëri. Binezijë' ilë'ë Diuzi ra'o ben' laxta'o yëri por nun quie chi rzudyi'ilëro Cristo. Quie lena' naca quieejë' ca quie ben' ucha'o yo, bgudyinë' yu tu neza, bibënë' gan idyinnë' ga zionë'. ³³ Lena' rguixogue'n quieyaquë' lë'ë guichi la'iya quie Diuzi cani:

Baose'ela' Diuzi zi'inë' lao yedyi quie ben' Israel, pero psebi'jë' lëbë'. Quie lena' raca quieyaquë' ca quie ben' ru'u yo ni'e, bgudyinë' yu tu neza.

Pero nu ben' rzudyi'ilë zi'inë', bigaca bayëchi' quiénë', huega'nnë' huen.

10

¹ Bicha', du guicho du la'adya' rulidza' Diuzi re'enda' yetza' yaca ben' Israel pensari quieyaquë' gata' yela' neban quiejë' tuzioli. ² Nia' le'e tali na' re'enjë' tzionla'adyi'ljë' Diuzi, pero binezijë' bi huejë'. ³ Binezijë' bi huejë' ta ilë'ë Diuzi lëjë' ben' laxta'o yëri. Na' re'enjë' huejë' cuinzijë' ben' laxta'o yëri. Racajë' pensari chi uzujë' di'idza' ca mandado rue lao guichi ley pca'n Diuzi lao na'a Moisés, cana' ilë'ë Diuzi lëjë' ben' laxta'o yëri. ⁴ Pero biruejë' ca re'en Diuzi

huejë', porque tanun quie dan' inaoro xneza Cristo, cana' ilë'ë Diuzi ra'o ben' laxta'o yëri, cala porque dan' uzuro di'idza' ca mandado rue lao guichi ley quiénë'.

⁵ Na'ra bzu Moisés di'idza' lë'ë guichi ta rguixogue'në' ra'o de quie chi tali uzuro di'idza'ca mandado rue lao guichi ley pca'n Diuzi lao na'anë', chi ni tu lasa bigaparo falta lao dza rdaro lao yedyi layu, na'ra por lena' gun Diuzi ra'o yela' neban tuzioli. Pero nunu yezue hue gan huejë' cana'. ⁶ Pero ta gun Diuzi ra'o, gunnë' yela' neban quiero tuzioli tanun quie dan' rzudyi'ilëro Cristo. Biruen zi tzioro guibá tzexi'ro Cristo yeyëzinë' gacalënë' ra'o. ⁷ Lëscan' biruen zi yeyëziro ga nita' ben' huati tzexi'ro Cristo yeguidë' gacalënë' ra'o. ⁸ Pero ¿ca biži rnan lë'ë guichi la'iya? Cani rnan: "Con di'idza' yero lu'u ru'aro, con pensari yu'u lu'u guicho laxta'oro, con lëzin gun Diuzi ra'o yela' neban quiero tuzioli." Lena' rguixogue'ro benë'. ⁹ Porque chi inaro naca Cristo xuzi xa'nro zaqué'lao lao benë', chi yu'uro pensari tali na' pseban Diuzi lëbë', na'ra gun Diuzi ra'o yela' neban tuzioli. ¹⁰ Cani nacan: Tanun quie dan' yu'u pensari lu'u guicho laxta'oro pseban Diuzi Cristo, quie lena' ilë'ë Diuzi ra'o ben' laxta'o yëri. Lëscan' tanun quie di'idza' rero lu'u ru'aro inaro naca Jesucristo xuzi xa'nro zaqué'lao lao benë', quie lena' gun Diuzi ra'o yela' neban tuzioli.

¹¹ Lë'ë guichi la'iya rguixogue'n rnan caniga: "Nu ben' rzudyi'ilë lëbë', bigaca bayëchi' quiénë' huega'nnë' huen." ¹² Pues tuzi ca zaca'ro lao Cristo, la' acazi ben' Israel, la'acazi ben' za' yedyi tula, como dan' naca Cristo xuzi xa'n yuguluro,

taže huela'iyanë' nu ben' rulidza lëbë!. ¹³ Porque tali nacan ca nan lë'ë guichi la'iya cani: "Yugulu ben' uzëto laohuë', ben' ina naca Cristo xuzi xa'nnë', hue'në' leyaquë' yela' neban tuzioli."

¹⁴ Pero bisaque' uzëtoyaquë' laohuë' inayaquë' naca Cristo xuzi xa'nnë' chi birzudyi'ilëjë' lëbë'. Lëscan' bisaque' sudyi'ilëjë' lëbë' chi binenezijë' cabë' bënë'. Lëscan' bisaque' inezijë' cabë' bënë' chi nunu yëbi leyaquë'. ¹⁵ Lëscan' bisaque' yëbi benë' leyaquë' chi bizu ben' use'ela' lëjë'. Lëcana' nan lë'ë guichi la'iya quie Diuzi cani: "Tady'a'a gula rue yaca ben' rguixogue' xti'idza' Diuzi."

¹⁶ Pero cala yugulu benë' rue quieyaquë' con cabë rna Diuzi cuenda hue' Diuzi lëjë' yela' neban tuzioli. Nacan ca una Isaías dza na'te rëbinë' Diuzi: "Tu chopazi benë' rue quieyaquë' di'idza' la'iya quio' ta yëbindo'jë!". Cana' unë' rëbinë' Diuzi. ¹⁷ Na'ra nia' le'e, chi yero uzënagaro di'idza' la'iya quie Diuzi, lena' ruen mandado quiero sudyi'ilëro Cristo.

¹⁸ Pero rnaba' le'e tu di'idza': ¿Biži raca quie ben' Israel? ¿Raca quiejë' binezijë' con cabë' rna di'idza' la'iya quie Diuzi? Cala raca quiejë' cana'. Claro nezijë' con cabë' rna di'idza' la'iya quie Diuzi, porque rnan lë'ë guichi la'iya quie Diuzi cani: Duže yedyi ga rda ben' Israel nu'ayaquë' guichi ga yu'u di'idza' la'iya quie Diuzi.

¹⁹ Tatula rnaba' le'e: ¿Bi ca nale? ¿Nale binezí ben' Israel de que ulio Diuzi ben' za' yedyi tula ta gacayaquë' ben' quienë'? Pues nezijë', porque dza na'te, dza uda Moisés lao yedyi layu, bzunë' di'idza' lë'ë guichi con cabë' una Diuzi rëbinë' ben' Israel cani:

Tanun quie cuioga' ben' za' yedyi tula, ben' binaca ben' Israel ta huela'iya' leyaquë', cana' gacažë'le leyaquë'.

Tanun quie gacalia' ben' tula, ben' nale ben' tondo, cana' idza'le leyaquë'.

20 Lëscan' dza uda Isaías lao yedyi layu, bibdzebinë' bzunë' lë'ë guichi con cabë' una Diuzi cani:

Yaca ben' binaca ben' Israel, barnaoyaquë' xneza'.

Yaca ben' binaca ben' Israel, baruela'iya' leyaquë'.

21 Lëscan' dza na' una Isaías cabë' bë ja ben' Israel unë' rëbinë' leyaquë': “Yugu dza rëbi Diuzi lëjë', pero yela' yeladyi' quiejë' biruzënagajë’.”

11

Baolio Diuzi bala ben' Israel

1 Na'ra inaba' le'e: ¿Apsanla'adyi' Diuzi yaca ben' Israel? Pues bipsanla'adyi' Diuzi leyaquë'. Hasta në'ëdi' ulio Diuzi naca' ben' Israel. Naca' žico' ži' isuba Abraham. Naca' familia quie Benjamín, ben' uzu tiempote. **2** Desde dza na'te beyuebë' Diuzi ben' Israel ulionë' lëjë' gacajë' ben' quienë'. Biusanla'adyi' Diuzi leyaquë'. ¿Binezile con cabë' rnan lë'ë guichi la'iya quie Diuzi ga rguixogue'n quie profeta Elías? Bigala'adyi'le cabë' bë profeta Elías, zuë' rulidzë' Diuzi udaohuë' yaca ben' Israel xquia. **3** Unë' rëbinë' Diuzi: “Xuza' Diuzi, abëti ben' Israel yugulu ben' rguixogue' di'idza' quio'. Apquinuyaquë' labecugo ta nueyaquë' guixi'dao' ga rionla'adyi'yaquë' luë'. Tuza' në'ëdi' babega'na'. Lëzi bare'enje' gutijë' në'ëdi'.” **4** Pero na' una Diuzi gudyinë' lëbë': “Cala tuzo' luë' bega'nlo'. Nenita' igadyi mila ben' naca ben' quia', ben' birionla'adyi' ta pcha'a benë' najë'

Diuzi quiejë!.” ⁵ Cabë' guca dza na'te, cana' racan na'a. Nenita' tu chopa ben' Israel, ben' du guichi du dula'adyi' rue quie xti'idza' Diuzi. Gusto quie Diuzi baolionë' leyaquë' gacajë'ben' quiénë'.

⁶ Porque cala ulio Diuzi lëjë' tanun quie dan' bi cosa bëyaquë'. Chi tali rbio Diuzi ra'o tanun quie bi cosa ruero, lena' huero obligado Diuzi cuionë' ra'o gacaro ben' quië'. Pero bisaque' huero obligado Diuzi, gusto quiénë' rbionë' nu ben' re'en cuionë' gaca ben' quiénë'.

⁷ ¿Ca biži inaro quie ben' Israel? Bibëjë' gan yugulujë' gata' yela' neban quiejë' tuzioli. Yaca ben' ulio Diuzi, lëjë' sí, bëjë' gan. Psanla'adyi' Diuzi yaca los demás ben' Israel, ben' yaladyi'.

⁸ Cana' rguixogue'n lë'ë guichi la'iya quie Diuzi cani: “Yela' yeladyi' quiejë' apchula Diuzi pensari quiejë' ta bitzioñ'e'ejë' con cabë' rna di'idza' la'iya quiénë'. La'acazi rlë'ejë' dyë'ëdi, ruejë' ca ben' birlë'ë. La'acazi reyaquë' dyë'ëdi, ruejë' ca ben' bire. Cana' raca quiejë' hasta na'adza.” ⁹ Lëscan' quie ben' Israel una rey David dza na' con cabë' rnën cani:

Ruen žudyi quie ta de quiejë'.

Con ta raxejë' gaojë' yo'ojë', con ta raxejë' huejë', lëlena' udyiagui'n leyaquë'.

Lëlena' uca'nnan leyaquë' mala lao Diuzi, huenë' lëjë' castigo.

¹⁰ Huechula laoyaquë' ta biilë'ëyaquë' tuzioli.

Lëscan' gacajë' bego tuzioli.

Cana' una rey David dza na'te.

¹¹ Na'ra inaba' le'e: ¿Yela' yeladyi' quie ben' Israel apsanla'adyi' Diuzi leyaquë' tuzioli? Cala tuzioli apsanla'adyi' Diuzi leyaquë'. Pero racalë

Diuzi ben' binaca ben' Israel ta hue quieyaquë' xti'idzë', na' gata' yela' neban quiejë' tuzioli cuenda ilé'ë ben' Israel cabë' tahuen na' raca quie ben' binaca ben' Israel. Cana' huenan quie ben' Israel ínaojë' xneza Cristo gata'rë yela' neban quiejë' tuzioli. ¹² Tahuen guca quie ben' binaca ben' Israel caora uquixi ben' Israel bibë quiejë' xti'idza' Diuzi. Pero huacara huen gula quie ben' binaca ben' Israel caora idyin dza inao yaca ben' Israel xneza Cristo, na' gata' yela' neban quiejë' tuzioli.

¹³ Pero re'enda' inia' le'e itu di'idza', le'e ben' binaca ben' Israel. Pues tanun quie dan' use'ela' Diuzi në'ëdi' ta quixogui'a le'e xti'idza' Diuzi, lena' nacan belao ca dyin quie Diuzi rua'. ¹⁴ Cana' répa' ben' Israel, ben' yedyi quia', cuenda huenan quieyaquë' inaoyaquë' xneza Cristo cabë' rnaole le'e, na' gata'rë yela' neban quiejë' tuzioli. ¹⁵ Caora blé'ë Diuzi bire'en ben' Israel inaoyaquë' xneza Cristo, na'ra udiloguë' yaca ben' za' yedyi tula, yaca ben' re'en inao xneza Cristo. Pero cala bire'en Diuzi inao ben' Israel xneza Cristo. Lega re'en Diuzi inaojë' xneza quiénë'. Lega yedaohue Diuzi caora idyin dza inao yaca ben' Israel xneza Cristo. Lëdza na' gaca quiejë' ca quie ben' baguti beban tatula. ¹⁶ Chi banuela'iya Diuzi yëzo yëta xtila ta gaca pan, lëscan' naca la'iya pan ta bro lu'u horno. Lëscan' cana' nacan quie nu yaga. Chi banuela'iya Diuzi lue yaga, lëscan' naca la'iya taca' yaga. Lëscan' nacarë quie ben' Israel. Chi bë xuzixta'oje' quie Diuzi, lëscan' idyin dza hue žico' žil'isubajë' quie Cristo.

¹⁷ Naca yaca ben' Israel ca quie tu yaga olivo.

Naca bala ben' Israel ca quie taca' yaga olivo. Yela' yeladyi' quiejë' baochugu apsanla'adyi' Diuzilëjë', pero baozi' Diuzi le'e, ben'za' yedyi tula. Banaca quiele ca quie taca' yaga guixi' nadilaten yaga olivo. Cana' gaca huen quiele, na' huaca yezi'le fuerza quie Diuzi cabë' rezì' taca' yaga fuerza quie luena. ¹⁸ Pero bihuele cuinle ben' že dan' baochugu Diuzi taca' yaga olivo, bë Diuzi quiele ca quie yaga nadilaten yaga olivo. Bigala'adyi'le cala por nun quie le'e nezi' lue yaga fuerza, dechan' por nun quie lue yaga nezi'le le'e fuerza.

¹⁹ Durpende yëbile në'ëdi': "Hue'encazi, pero baochugu Diuzi taca' yaga olivo tacuenda gaca nëto' ben' quienë' lao laza ben' Israel." ²⁰ Pero rëpa'le'e: "Baochugu Diuzi taca' yaga olivo, inaro ben' Israel, como dan' psebi'jë' Cristo. Pero le'e, ben' binaca ben' Israel, por nun quie dan' barnaole xneza Cristo nacalële Diuzi tuže. Quie lena' gapale cuidado bihuele cuinle ben' že. ²¹ Cana' nacan porque bibeži'že Diuzi nu ben' Israel, dan' psebi'jë' Cristo. Na'ra lëcana'zi huaca bisi'že Diuzi nu ben' za' yedyi tula chi biinaojë' xneza Cristo. ²² Na' ulehuecara pensari ca naca yela' ben' huen quie Diuzi. Pero lëscan' naca Diuzi ben' de pensari. Dyë'ëdi rna'në' huenë' castigo nu ben' bire'en hue quie di'idza' quië'. Pero le'e, taže bagucalë Diuzi le'e. Pero ruen zi inaole xneza Diuzi gapalenë' bala'ana, porque chi bihue quiele di'idza' quië', lëscan' le'e, hue Diuzi le'e castigo. ²³ Porque chi ye utza' ben' Israel pensari quiejë' inaojë' xneza Cristo, na'ra yezi' Diuzi lëjë' utilanë' lëjë' yaga olivo tatula. Decazi yela' huaca quie Diuzi huenë' cabë' re'ennë' huenë'. ²⁴ Pues ulio Diuzi le'e gacale

ben' quiénë', la'acazi nacale ca quie tu yaga guixi', la'acazi binacale ben' Israel, pero mazara gue'en Diuzi ben' Israel gacajé' ben' quiénë' utilané' lëjé' yaga olivo tatula.

Huadyin dza inao yaca ben' Israel xneza Cristo

²⁵ Re'enda' inia' le'e tu di'idza' con cabë' baodixogue' Diuzi në'ëdi' cuenda inezile cabë' gaca, na' bihuele cuinle ben' že. Tali na' apsanla'adyi' Diuzi bala ben' Israel tanun quie yela' yeladyi' quiejé'. Pero caora abeya ben' re'en inao xneza Cristo, ben' za' yedyi tula, na'tera yezulao Diuzi yeyuenë' ben' Israel tuže tatula.
²⁶ Lëdza na' sulao inao yugulu ben' Israel xneza Cristo. Cana' rguixogue'n lë'ë guichi la'iya quie Diuzi cani:

Lado ben' Israel huaró tu ben' yedyi quiejé', ben' uzioñe'e lëjé'.

Lëben' na' yegubë' tamala quie ben' Israel.

²⁷ Cana' uzu Diuzi di'idza' con cabë' di'idza' bega'nlenë' xuzixta'o ben' Israel unë' yezi'zenë' dula' quieyaqué'.

Cana' rnën lë'ë guichi la'iya quie Diuzi.

²⁸ Pero na'a barue ben' Israel condre Diuzi. Biralejé' guti Cristo lë'ë yaga cruzo cuenda gata' yela' neban quiejé' tuzioli. Pero como biralejé', lena' rguilo Diuzi le'e, ben' za' yedyi tula, nu le'e re'en inao xneza Cristo. Pero nadyë'ëcazi Diuzi ben' Israel. Lena' ulionë' xuzixta'ojé' gacajé' ben' quiénë'. ²⁹ Uzu Diuzi di'idza' quiénë' cabë' unanë' huenë'. Como ulio Diuzi ben' Israel gacajé' ben' quiénë', lena' biusanla'adyi'në' leyaqué' tuzioli.
³⁰ Lële'e, ben' binaca ben' Israel, bibë quiele quie Diuzi dza na'te, pero caora uru'un ben' Israel

Cristo tzala'la, na'ra bezulao Diuzi yeyuenë' le'e tuže beyëchi'la'adyi'në' le'e. ³¹ Na'ra cala le'e, nechan' yaca ben' Israel, lëleyaquë' birue quiejë' quie Diuzi. Pero huadyin dza yeyëchi'la'adyi' Diuzi ben' Israel tatula cabë'beyëchi'la'adyi'në' le'e. ³² Porque tuzi ca bë Diuzi, baochugulinë' de dula' xquia quie Yuguluro. Na'ra quie lena' tuzi ca huenë', yeyëchi'la'adyi'në' Yuguluro.

³³ Biyeyudyi yedu yela' rioñe'e, yela' nezi quie Diuzi. Bisaque' huebë'ro dužete ca naca pensari quienë', ca naca xnezë'. ³⁴ ¿Nuži saque' tzioñe'e dužete pensari quie Diuzi? ¿Nuži saque' usëdi lëbë'? ³⁵ Nunu saque' yëbi Diuzi: "Tu cani reya'alo' quia!" ³⁶ Porque bzalo Diuzi Yugulu ta de, yela'na' Yugulu ta de nacan quienë'. Ben' ūze, ben' bala'ana naca Diuzi tuzioli. Amén.

12

Ni rguixogue'n cabë' reya'ala' hue ben' quie Diuzi, ben' naca la'iya

¹ Na'ra, bicha', babeyëchi'la'adyi' Diuzi le'e. Quie lena' du guicho du la'adya' inia' le'e reya'ala' tzesanle cuinle lao Diuzi, huele cuinle ca gun quie Diuzi ta biyeyula yelen. Gacale ben' naca la'iya, cana' yeyula'adyi' Diuzi le'e. Cana' reya'ala' huele tzionla'adyi'le Diuzi. ² Bireya'ala' yenaole pensari mala quie ja ben' nita' lao yedyi layu. Reya'ala' yetza'le pensari quiele, yenaole xneza Diuzi cuenda yetza'nan quiele Yugulu ca ruele. Cana' inezile ca re'en Diuzi huele, porque ca re'en Diuzi huero nacan ta gacalën ra'o, nacan ta yeyula'adyi'në' ra'o, nacan tadya'a gula.

3 Yela' ben' huen quie Diuzi ulionë' në'ëdi' ta uzioñe'eda' le'e. Lena' inia' le'e bireya'ala' huele cuinle ben' že. Du guicho du la'adyi'le reya'ala' huele pensari dya'a segün cabë' nue Diuzi quie quiele barue quiele xti'idza'në'. **4** Porque cani nacan: Tuzi cuerpo quiero naca, pero taže netza' tu tu parte quien, taže netza' dyin quie quien. **5** Lëscan' cana' naca quie ra'o ben' nao xneza Jesùs. La'acazi nacaro ben' zë, nacaro tu cue' ben' nacalë Cristo tuže. La'acazi netza' dyin quie Diuzi huero quie quiero, naca yuguluro tuže.

6 Netza' ta banegun Diuzi quiero tu turo. Reya'ala' huero dyin dya'a segün ta banegun Diuzi quiero tu turo. Chi banegun Diuzi quiero uzioñe'ero benë' con cabë' rna di'idza' la'iya quienë', na'ra lena' reya'ala' huero segün cabë' nue Diuzi quie quiero barue quiero xti'idza'në'. **7** Chi banegun Diuzi quiero gacalëro benë', na'ra reya'ala' gacalërojë' dyë'ëdi. Chi neziro uzioñe'ero benë' con cabë' rna xti'idza'Diuzi, cana' reya'ala' huero. **8** Chi neziro hue'ro benë' di'idza' zela'adyi', cana' reya'ala' huero. Chi de dumi quiero, reya'ala' gacalëro benë', bihuero cuenda chi yeyuejë' laohue. Chi neziro udze'ro xnezi bi dyin hue ja benë', cana' reya'ala' huero du guicho du la'adyi'ro. Chi neziro yeyëchi'la'adyi'ro ben' yëchi', cana' reya'ala' huero du guicho du la'adyi'ro, bihuerojë' stu'!

Ni rguixogue'n cabë' reya'ala' hue ben' nao xneza Cristo

9-10 Bireya'ala' idyë'ëro laguedyiro de ladzazi, pero du guicho du la' adyi'ro reya'ala' idyë'ëro ben' bichiro, ben' nacalëro Cristo tuže. Puro

tady'a' reya'ala' huero, bihuero tamala. Reya'ala' gaparo laguedyiro bala'ana yuguluro.

¹¹ Bireya'ala' huero yela' huëdi, den' dula'adyi'ro reya'ala' huero dyin. Lëscan' dula'adyi'ro reya'ala' huero cabë' mandado re'en Diuzi huero.

¹² Reya'ala' suro contento cuezaro dyë'ëdi dza yezi' Diuzi ra'o. Reya'ala' si'zero biidza'ro cati raca zëdi quiero. Bireya'ala' usanro ulidzaro Diuzi.

¹³ Reya'ala' gacalëro laguedyiro ben' nao xneza Cristo, ben' bide quie. Reya'ala' gapachi'ro nu ben' za' žan yu'u quiero.

¹⁴ Reya'ala' yëbiro Diuzi huela'iyanë' nu ben' za' rdila rnë len ra'o. Bireya'ala' udze'de'ro benë'.

¹⁵ Reya'ala' yedaohuelëro laguedyiro cati raca tady'a' quieyaquë'. Reya'ala' yeyëchi'la'adyi'lëro laguedyiro cati raca tazëdi quieyaquë'.

¹⁶ Reya'ala' huero tuže yuguluro. Bireya'ala' yežë'ro laguedyiro. Bireya'ala' huero yaladyi' ben' yëchi'. Bireya'ala' huero cuinro ben' že.

¹⁷ Bireya'ala' gacalëro lëbi ben' mala. Reya'ala' huero bala tzu'ulëro laguedyiro dyë'ëdi. ¹⁸ Por tu parte quiero, huero bi huero tacuenda nita'lëro yugulu benë' dyë'ëdi, ta bibi zëdi gata'. ¹⁹ Na'ra bicha', nedye'ëda' le'e, inia' le'e bireya'ala' yejuero laohue quie ben' mala. Naoyubi Diuzi bi huenë' quie ben' mala. Cana' rguixogue'n lë'ë guichi la'iya quie Diuzi de que nacan cuenda quie Diuzi huenë' benë' castigo, cala ra'o. Cana' una Diuzi. ²⁰ Lëscan' una Diuzi de que chi rdue ben' rudie ra'o, reya'ala' hue'rojë' ta gaojë'. Chi rbilijë', reya'ala' hue'rojë' ta yo'ojë', porque chi huero

cana', huacabë'jë' nacaro ben' huen yedue'jë'. Cana' una Diuzi. ²¹ Bihue'ro lato hue tamala ra'o gan, reya'ala' huero gan lao tamala, huero puro tahuen.

13

¹ Yuguluro reya'ala' uzuro di'idza' cabë' mandado rue nu ben' quie gobierno, porque Diuzi ulëchinë' ben' quie gobierno. Bizu ben' quie gobierno chan' biulëchi Diuzi lëbë'. ² Nu ben' biruzu di'idza' cabë' mandado rue ben' quie gobierno, na' ruetenë' contra Diuzi, de dula' xquia quiénë', hue Diuzi lëbë' castigo. ³ Birdzebi ben' rue tadya'a ben' quie gobierno. Pero sí, rdzebi ben' rue tamala ben' quie gobierno dan' gata' castigo quiejë'. Chi re'enro suro contento, chi re'enro birdzebiro ben' quie gobierno, na'ra reya'ala' taro dula'adyi'ro huero tahuen. Cana' gacabë' ben' quie governo nacaro ben' huen. ⁴ Cana' reya'ala' huero como dan' ulëchi Diuzi gobierno ta gaca huen quiero. Chi birdaro dula'adyi'ro bihuero tahuen, reya'ala' yejuero pensari quiero como dan' naca cuenda quie governo huejë' ra'o castigo. Mandado quie Diuzi na' rue gobierno mandado gaca castigo ben' rue tamala. ⁵ Quie lena' reya'ala' uzuro di'idza' cabë' mandado rue nu ben' quie gobierno, no solamente ta bigata' castigo quiero, pero lëscan' como dan' nacan tahuen, nacan ta reya'ala' huero. ⁶ Quie lena' reya'ala' quižuro impuesto como dan' rue ben' quie governo mandado quie Diuzi cabë' dyin ruejë'.

⁷ Reya'ala' quižuro chi zu ta reya'ala'quižuro. Reya'ala' quižuro dumi ta rtupa ben' yedyi.

Reya'ala' quižuro impuesto quie gobierno. Reya'ala' gapala'nro yugulu ben' rnabë!. ⁸ Chi zu ta reya'ala' quižuro quie benë', reya'ala' useyudyiro quižuron. Pero bireya'ala' usanro idyë'ëro laguedyiro. Chi nedyë'ëro laguedyiro, con lëzin babzuro di'idza' cabë' mandado rue lao guichi ley quie Diuzi yuguluten. ⁹ Lë'ë guichi ley quie Diuzi rguixogue'n ra'o de que bireya'ala' gasilëro nigula quie ben' tula. Lëscan' quie nigula, bireya'ala' gasilënë' be'mbyu tula. Bireya'ala' gutiro benë', bireya'ala'cuanro quie benë', bireya'ala' si'ro benë' yë', bireya'ala' sa'la'adyi'ro ta de quie benë'. Cana' rnan lë'ë guichi ley quie Diuzi. Pero lëscan' rguixogue'n ra'o de que reya'ala' idyë'ëro benë' cabë' nadyë'ëro cuinro. Chi huero cana', banaca quiero babzuro yugulu di' idza' cabë' mandado rue Diuzi lë'ë guichi ley quienë!. ¹⁰ Chi nadyë'ëro benë', bihuerojë' mala. Cana' huero uzuro di'idza' dyë'ëdi ca mandado rue Diuzi lë'ë guichi ley quienë'!

¹¹ Como cana' nacan, reya'ala' huero pensari ca tu dza rdaro lao yedyi layu. Reya'ala' huebë'ro abdyin hora yeyu'uro pensari dyë'ëdi, como dan' barueran bago dza yezi' Diuzi ra'o, cala ca dza na'te, dza uzulaoro inaoro xneza Cristo. ¹² Ilë'ëti'zi rdziogue iyudyi dza rdaro lao yedyi layu idyin dza yezi' Diuzi ra'o. Quie lena' bireya'ala' huero tamala ca ben' rda lao lato lao chula. Reya'ala' biidzebiro suro listo sëraro ca zë soldado, ben' napa fuerza, ben' rda te dza. ¹³ Reya'ala' taro dyë'ëdi ca ben' rda te dza. Bireya'ala' taro huero hue'e. Bireya'ala' taro ga ruejë' lani, ga ruejë' ru'be, ga ruejë' huedila. Bireya'ala' talëro nigula

con ganzi. Bireya'ala' taro quiloro zëdi quiloro dila. ¹⁴ Reya'ala' taro yenaoro tuže Jesucristo dyë'ëdi. Bitaro huero ta rnazin quiero.

14

Bireya'ala' inëbižoro laguedyiro ben' nao xneza Jesús

¹ Reya'ala' hue'lële ben' zaozulao inao xneza Jesús di'idza' žela'adyi'. Bitzu'ule huedila huenë tu ta binaca. ² Por ejemplo, bala ben' nao xneza Jesús rnajë' ru'en lato gaoro biti'tezi ta de. Na' ibala ben' nao xneza Jesús, ben' zaozulao inao xnezanë', rnajë' bireya'ala' gaoro bë'ëla'. Quie lena' puro yëza cuan gaojë'. ³ Na' yaca ben' rao biti'tezi ta de, bireya'ala' ilë'ëyaquë' mala ben' rao puro yëza cuan. Bireya'ala' inëbižoyaquë' laguedyijë' como dan' rupa cue'jë' nacajë' ben' nao xneza Jesús. ⁴ ¿Nuži bë le'e mandado inëbižole laguedyile, ben' naorë xneza Diuzi? Nacan cuenda quie xa'një' chi ruejë' tahuen, chi ruejë' tamala, cala cuenda quiele. Pero huacacazi huen quiejë', como dan' de yela' huaca quie Diuzi ta uca'nnë' lëjë' huen.

⁵ Re'enda' inia' le'e itu ejemplo: Yu'u bala ben' nao xneza Jesús rnayaquë' tuzi dza naca la'iya tzion'la'adyi'ro Diuzi, cala biti'tezi dza nacan dza huen. Na' yu'u ibala ben' nao xneza Jesús rnajë' biti'tezi dza nacan dza huen tzion'la'adyi'ro Diuzi. Quie quiele reya'ala' huele pensari inezile dyë'ëdi ta huele cabë' reya'ala' huele. ⁶ Na'ra quie ben' rna tuzi dza naca la'iya tzionla'adyi'ro Diuzi, cala yugu dza nacan huen, ruejë' cana' ta

gapala'një' Cristo. Lëscan' yaca ben' rna biti'tezi dza nacan dza huen tzionla'adyi'ro Diuzi, ruejë' cana' ta gapala'nrejë' Cristo. Na'ra quie ben' rna ru'en lato gaoro biti'tezi ta de, na' ruejë' cana' ta gapala'një' Cristo. Lëscan' ben' rao puro yëza cuen, na' ruejë' cana' ta gapala'nrejë' Cristo, na' yëbijë' Diuzi diuxcalelo'.

⁷ Ni tu ra'o binita'ro tuzi cabë' nita'ro lao yedyi layu. Ni tu ra'o bigatiro tuzi cabë' gatiro lao yedyi layu. Zu Cristo rna' ruhuianë' ra'o. ⁸ Chi zuro nabanro lao yedyi layu, na' zuro nabanro ta gapala'nro Cristo. Lëscan' chi gatiro yeyoro guibá, na' gatiro yeyoro guibá ta gapala'nro Cristo. La'acazi nabanro, la'acazi gatiro, pero nacaro ben' quie Cristo. ⁹ Cana' nacan como aguti Cristo bebannë' naqué' xuzi xa'n Yugulu benë', la'acazi ben' neban, la'acazi ben' huati.

¹⁰ Pero le'e, ¿bixquien' rnëbižole ben' bichile ben' nao xneza Jesú? ¿Bixquien' rezë'le laguedyile? Pues Yuguluro naca quiero yedyinro lao Cristo huero cuenda cabë' bëro, chi bëro tahuen, chi bëro tamala. ¹¹ Lena' rguixogue'n lë'ë guichi la'iya quie Diuzi cabë' unanë' cani:
Como nacan tali nabana', lëscan' nacan tali idyin
dza quitzu žibi Yugulu benë' laohua',
hueyaquë' në'ëdi' ben' že.

Cana' una Diuzi dza na'te. ¹² Cana' nacan huadyin dza quie quiero huero cuenda lao Diuzi cabë' bëro dza udaro lao yedyi layu.

Reya'ala' inaoro neza dya'a

¹³ Quie lena' bireya'ala' inëbižoro laguedyiro. Mejorla huero pensari inaoro neza dya'a cuenda biiquixi laguedyiro huejë' tamala por dula'

quiero. ¹⁴ Na'ra quie bë'ëla', cala cuinnan nacan žudyi nu gao len. Lena' banezda' dyë'ëdi como naca' ben' nao xneza xa'nro Jesús. Pero chi rue bala benë'pensari naca žudyi gaojë' bë'ëla', na'ra para lëjë' sí, binacan huen gaojë'n, como dan' raquejë' žudyi nacan gaojë'n. ¹⁵ Chi por nun quie dan' re'enro gaoro bi cosa utëbiro pensari quie yaca bi' bichiro, ben' nao xneza Jesús, na'ra lena' rulu'en rdziogue idyë'ëro yaca ben' bichiro. Bihuero ta yega'n yaca ben' bichiro mala lao Diuzi por nun quie dan' re'enro gaoro bi cosa. ¹⁶ Biutëbiro pensari quie bichi laguedyiro, ben' nao xneza Jesús. Bihuero bi cosa re'enro huero, la'acazi naparo derecho hueron, la'acazi neziro cala tamala chi hueron. ¹⁷ Binacan belao bi ta gaoro, bi ta yo'oro. Pero tabelao na' inaro tuzi pensari dya'a. Tabelao na' cue' chizi laxta'oro, suro contento tanun quie dan' yu'u lu'u guicho laxta'oro pensari quie Bichi Be quie Diuzi. ¹⁸ Redaohue Diuzi nu ben' rue cana', ben' nao xneza Cristo dyë'ëdi. Lëscan' hualë'ë yaca benë' lëbë' ben' huen.

¹⁹ Cana' huero seguir inaoro huero tadya'a cuenda na' cue' chizi laxta'oro, gacalëro laguedyiro ta tzioñe'ejë' mazara con cabë' rna xtilidza' Diuzi. ²⁰ Binaca huen te cana'zi dyin quie Diuzi por nun quie bi ta re'enro gaoro. Banezcaziro baben Diuzi lato gaoro yugulu ta de ta gaoro. Pero tamala na' gaoro bi cosa chi por lena' utëbiro pensari quie laguedyiro yela' na' huejë' ta bireya'ala' huejë'. ²¹ Mejorla biyo'oro bigaoro bi cosa, bihuero bi cosa chi por lena' utëbiro pensari quie ben' bichiro, ben' naorë

xneza Jesús, yela' na' huenë' tu ta bireya'ala' huenë'. ²² Reya'ala' gaparo cuidado cabë' ruero cuinro lao Diuzi. Bihuero cuinro ben' že nun que nacaro ben' quie Diuzi. Tahuen na' naca quiero chi bigao pensari quiero ra'o xquia cabë' ta ruero. ²³ Chi ineziro nacan xquia tu ta inan quiero huero, na' bireya'ala' hueron. Nacan xquia quiero chi hueron. Lëscan' reya'ala' ineziro dyë'ëdi chi nacan huen, na' hueron. Chi neziro dyë'ëdi binacan huen, mejorla bihueron como dan' nacan xquia quiero chi hueron.

15

Huero tahuen quie laguedyiro cala para ra'ozi

¹ Ra'o, ben' bazio tiempo nao xneza Cristo, reya'ala' gacalëro laguedyiro, ben' zaozulao inao xneza Cristo. Naca cuenda quiero gacalërojë' huero tahuen quiejë', cala para ra'ozi. ² Yuguluro reya'ala' huero tahuen quie laguedyiro, reya'ala' gacalërojë' tzioñe'eyaqué' mazara, na' huebë'jë' Diuzi hue quiejë' xti'idza'në'. ³ Cana' reya'ala' huero como dan' Cristo bibënë' huen para cuinzinë', pero lëscan' bënë' huen para yugulu benë'. Guca quienë' cabë' rguixogue'n lë'ë guichi la'iya quie Diuzi de que nu ben' rutasi runio Diuzi, lëscan' rutasi runiorënë' Cristo. Cana' rnëñ lë'ë guichi. ⁴ Na' rnia' le'e, yugulu ca di'idza' bzuyaqué' lë'ë guichi la'iya quie Diuzi dza na'te, nacan ta gacalën ra'o ta tzioñe'ero mazara Diuzi. Lëscan' nacan ta uxela'adyi'n ra'o ta cuezaro dyë'ëdi dza yezi' Diuzi ra'o biyeyatiro. ⁵ Rulidza' Diuzi gacalënë' le'e tzu'ulële laguedyile dyë'ëdi ca

reya'ala'huele le'e, ben' nao xneza Cristo. Naca Diuzi ben' racalë ra'o cuezaro dyë'ëdi. Naca Diuzi ben' ru'elë ra'o di'idza' žela'adyi'. ⁶ Cana' naca quiero cuenda yuguluro huero tuže gaparo Diuzi bala'ana. Naca Diuzi xuzi xan' Señor quiero Jesucristo.

Lëscan' bida Cristo lao yedyi layu cuenda inao yaca ben' binaca ben' Israel xnezanë', na' gapajë' Diuzi bala'ana

⁷ Reya'ala' huelero laguedyiro tuže cabë' bëlë Cristo ra'o tuže. Cana' gapala'nro Diuzi bala'ana. ⁸ Pero rnia' le'e, bida Cristo lao yedyi layu ta gacalënë' ben' Israel, na' uzunë' di'idza' cabë' di'idza' bega'nle Diuzi xuzixta'ohua' dza na'te. Bidë' ta ilë'ë ben' Israel naca Diuzi ben' ruzu di'idza'. ⁹ Lëscan' bida Cristo lao yedyi layu cuenda inao yaca ben' binaca ben' Israel xnezë', na' gapajë' Diuzi bala'ana tanun quie dan' beyéchi'la'adyi' Diuzi leyaquë'. Lena' rguixogue'n lë'ë guichi la'iya quie Diuzi cani:

Quie lena' gapa yaca ben' za' yedyi tula Diuzi bala'ana.

Quie lena' gulayaquë' himno ta gapala'një' lëbë'.

¹⁰ Lëzi zu itu cue' lë'ë guichi la'iya ga rguixogue'nan cani:

Reya'ala' yedaohuele le'e, ben' za' yedyi tula, len le'e, ben' Israel, ben' quie Diuzi.

¹¹ Lëzi zu itu cue' lë'ë guichi la'iya ga rguixogue'nan cani:

Ulegapa Diuzi bala'ana yugulu le'e, ben' za' yedyi tula.

Ulequixogue' yaca benë' ca ben' že naca Diuzi yugulu le'e, ben' binaca ben' Israel.

12 Lëscan' Isaías, ben' uzu dza na'te, bzunë' di'idza' lë'ë guichi de que:

Hualo tu ži'i suba Isaí.

Lëbë' gaquë' rey inabë'në' lao yaca ben' binaca ben' Israel.

Sudyi'ilëyaquë' lëbë' ta uca'nnë'yaquë' huen lao Diuzi.

Cana' rnan lë'ë guichi na'!

13 Na'ra në'ëdi' rulidza' Diuzi, ben' nuxela'adyi' ra'o, ta tzu'ule gusto cue' chizi laxta'ole como dan' barue quiele xti'idza'në'. Lëscan' rulidza'në' ta gaca žela'adyi' dyë'ëdi guicho laxta'ole tanun quie dan' baoyu'ule pensari quie Diuzi.

14 Na'ra bicha', banezda' dyë'ëdi nacale ben' huen, ben' rioñe'e. Nezile uzioñe'ele usëdile laguedyile, ben' nao xneza Cristo. **15** Cabë' di'idza' bzua' lë'ë guichi ni, biberugueda' inia' le'e cabë' reya'ala' tzioñe'ele cuenda bigalala'adyi'le cabë' unia' le'e. Cana' bia' por nun quie mandado pca'n Diuzi lao na'a, use'elë' në'ëdi' **16** tzaya' dyin quie Cristo entre yaca ben' binaca ben' Israel. Nacan mandado hua' tzetixogui'ajë' xti'idza' Diuzi cuenda hue quieyaquë' xti'idzë', yela' na' gata' yela' neban quiejë' tuzioli, na' yedyinyaquë' dyë'ëdi lao Diuzi. Cana' yezi' Diuzi lëjë', na' nacajë' ben' la'iya, ben' yu'u pensari quienë' lu'u guicho laxta'ohue.

17 Como naca' ben' quie Cristo Jesús, redaoahueda' bia' ca mandado bë Diuzi në'ëdi'.

18 Re'enda' inia' le'e cabë' bëla'iya Cristo në'ëdi' bia' cabë' mandado bënë' në'ëdi'. Lézin inia' le'e cala bila di'idza' inia' le'e. Gucalë Cristo në'ëdi' udixogui'a ben' binaca ben' Israel xti'idza' Diuzi, na'tera barue quieyaquë' xti'idza'në'. **19** Cana'

bia' udixogui'ajë' xti'idza' Diuzi, bia' yela' huaca quiénë', gucalë Bichi Be quiénë' në'ëdi'. Cana' bia' apseyudya' bia' mandado udixogui'a benë' xti'idza' Diuzi. Cana' bia' udixogui'a yaca ben' ciudad Jerusalén xti'idza' Diuzi. Lagazi cana' babia', baoya'a hasta ga rzulao yu nebaba Ilírico. [20](#) Cana' bia', bia' bala, uya'a yedyi ga binenezijë' chi zu Cristo udixogui'ajë' xti'idza' Diuzi. Cana' bia' cuenda tza'a yedyi tula ga nunu netzio tzetixogue' xti'idza' Diuzi. [21](#) Pero mejorla hua' seguir con cabë' rnan lë'ë guichi la'iya quie Diuzi cani:

Huanezi yaca ben' binenezi quiénë'.

Huayoñe'e yaca ben' binetzioñe'e quiénë'.

Bé Pablo pensari tziogué' ciudad Roma

[22](#) Quie lena' biužaque'da' guida' idena'a le'e como dan' bibënan lato la'acazi gu'unda' guida'. [23](#) Pero como abeyudyi compromiso napa' conlë yaca yedyi ga baodia', lëscan' como bazio zë iza raca' pensari guida' ideyuba' le'e, [24](#) quie lena', caora tza'a nación España, cana' re'enda' tia' ciudad quiele. Na' rapa' gusto yega'na' sulia' le'e ga'aca tu ta gunnan lato. Yeyudyi na', chi huele cule, gacalële në'ëdi' tzu'a neza tatula tza'a España. [25](#) Pero na'a raoyen yeya'a ciudad Jerusalén tzechua'a lë'ëti' sumi ta gacalën yaca ben' bichiro, ben' nao xneza Jesús nita' na'. [26](#) Cana' re'ennan hua', como dan' yaca ben' nao xneza Jesús nita' yu nebaba Macedonia, len yaca ben' nao xneza Jesús nita' yedyi Acaya, baptupajë' sumi ta ise'ela'yaquë'n quie ben' yëchi', ben' nao xneza Jesús nita' ciudad

Jerusalén. ²⁷ Redaohue ben' ptupa sumi como neziyaquë' nacan tahuén gacaléjë' laguedyijë', ben' nao xneza Jesús. Na'ra yu'un xnezi ta ruejë', porque rueyaquë' ta reya'ala' hueyaquë' quie ben' nita' ciudad Jerusalén. Cana' nacan, como dan' lao na'a ben' nita' ciudad Jerusalén barue quieyaquë' xti'idza' Diuzi barnaoyaquë' xneza Cristo. Na'ra lëjë' sí, reya'ala' gacaléjë' ben' nita' ciudad Jerusalén con ta de quieyaquë'. ²⁸ Caora abeyudyi yehua'a sumi lao yaca ben' nao xneza Cristo nita' ciudad Jerusalén, na'ra tza'a España tia' ideyuba' le'e. ²⁹ Nacan tali tuže huela'iya Cristo ra'o caora idyina' yedyi quiele.

³⁰ Bicha', re'enda' gacaléle në'ëdi'. Re' enda' huero tuže huero ca re'en Diuzi huero du guicho du la'adyi'ro. Chi huele cule, ulidzale Diuzi por në'ëdi'. Laohue xa'nro Jesucristo rnaba' le'e ulidzale Diuzi por në'ëdi'. Lëscan' como dan' nadyë'ële në'ëdi' cabë' bzioñe'e Bichi Be quie Diuzi le'e, rnaba' le'e ulidzale Diuzi por në'ëdi'. ³¹ Ulidzale Diuzi ta ucuasa ucui'onë' në'ëdi' quie tamala re'en hue yaca ben' nita' estado Judea quia', ben' binao xneza Cristo. Lëscan' ulidzale Diuzi para yaca ben' nita' ciudad Jerusalén, ben' nao xneza Cristo, ta si'yaquë' në'ëdi' dyë'ëdi gacalia'yaquë'. ³² Cana' rnaba' le'e ulidzale Diuzi por në'ëdi' cuenda idyina' dyë'ëdi idena'a le'e sua' contento yezila'adya' tu chi'. ³³ Rulidza' Diuzi, ben' cuëchi chizi laxta'oro, ta ina' ihuianë' yugule. Amén.

16

Rugapa Pablo diuži yaca ben' nao xneza Jesús

¹ Redaohueña' idyin ben' zanro Febe yedyi quiele. Taže racalénë' ben' nao xneza Cristo nita' yedyi Cencrea. ² Si'le lëbë' dyé'ëdi ca rue ben' nao xneza Cristo. Gacalélenë' tu ta rdzioguenë', porque ben' zë bagucalénë'. Lëscan' bagucalénë' në'ëdi'.

³ Ugapale diuži Priscila len Aquilo. Nacayaquë' ben' compañero quia'. Aracaléyaquë' në'ëdi' ruendo' dyin quie Cristo Jesús. ⁴ Bibdzebiyaquë' gatiyaquë' gucaléjë' në'ëdi' caora aruen žudyi guti yaca benë' në'ëdi'. Quie lena' inia' diuxcaleyaquë' gucaléjë' në'ëdi'. Pero cala tuza' në'ëdi' inia' diuxcaleyaquë', lëscan' yugulu ben' nao xneza Cristo, ben' binaca ben' Israel, inajë' diuxcaleyaquë'.

⁵ Ugapale diuži yaca ben' bichiro, ben' regu'udi' žan yu'u quie Priscila len Aquilo. Lëscan' ugapale diuži Epeneto, ben' naca amigo quia'. Lëbë' naquë' ben' nëro, ben' unao xneza Cristo entre yaca ben' nita' yu nebabá Acaya. ⁶ Ugapale diuži María, ben' ruelèle dyin quie Diuzi tuže. ⁷ Ugapale diuze ben' yedyi quia' Andrónico, len Junias, ben' uya'lia' dyiguiba tuže. Anezi yaca apóstol nacayaquë' ben' huen gula. Tu binenauhua' xneza Cristo, barnaoyaquë' xneza Cristo.

⁸ Ugapale diuži Amplias, ben' naca amigo quia', ben' naorë xneza Cristo. ⁹ Ugapale diuži Urbano, ben' naca compañero quiendo'. Aracalénë' nëto' ruendo' dyin quie Cristo Jesús. Lëscan' ugapale diuži Estaquis, ben' naca amigo quia'. ¹⁰ Ugapale diuži Apeles, ben' nao du guicho du la'adyi' xneza Cristo. Lëscan' ugapale diuži yaca ben' naca familia quie Aristóbulo. ¹¹ Ugapale diuži Herodión, ben' naca ben' yedyi quia'. Lëscan'

ugapale diuži yaca ben' naca familia quie Narciso, con nuyaquë' naoyaquë' xneza Cristo. ¹² Ugapale diuži Trifena len Trifosa. Nacajë' ben' rue dyin quie Cristo. Lëscan' ugapale diuži Pérsida, ben' naca ben' zanro tanun quie barnaorënë' xneza Cristo. Taže bazioguë' naoihuë' ruenë' dyin quie Cristo. ¹³ Ugapale diuži Rufo, ben' rue quie xtil'idza' Cristo dyë'ëdi. Lëscan' ugapale diuži žna'në' como rlë'ënë' në'ëdi' ca ži'inë'. ¹⁴ Ugapale diuži Asíncrito, len Flegonte, len Hermes, len Patrobas, len Hermas, len yaca los demás ben' bichiro, ben' nao xneza Jesús, ben' regu'udi' len leyaquë' na!. ¹⁵ Lëscan' ugapale diuži Filólogo len Julia. Ugapale diuži Nereo len bi' zannë'. Lëscan' ugapale diuži Olimpas len yaca los demás ben' bichiro, ben' nao xneza Cristo, ben' regu'udi' len leyaquë' na!.

¹⁶ Quëdyile laguedyile dyë'ëdi. Gaole xagajë' tu psitu, na' yëbileyaquë' padieux. Yaca los demás ben' nao xneza Jesús, ben' nita' yedyi tula, rugapajë' le'e diuži.

¹⁷ Na'ra inia' le'e itu di'idza', bicha!. Gapale cuidado ina'le dyë'ëdi nu ben' hue le'e chopa tzona cue', ben' udze' le'e neza tula ta binaca quie Diuzi. Bihuelële leyaquë' tuže, ¹⁸ como dan' cala mandado quie xa'nro Jesucristo ruejë', dechan' ta racazi la'adyil'jë' ruejë' cana!. Rdalëyaquë' di'idza' huizi' yë' quieyaquë' huejë' gan ben' binenezi cabë' nacayaquë'. ¹⁹ Anezi yaca benë' cabë' naca le'e, barnaole xneza Cristo. Quie lena' zua' gusto, re'enda' huele seguir huele puro tadya'a, bihuele ni tu tamala. ²⁰ Ilë'ëti'zi idyin dza quižo Diuzi tu castigo huala gula quie xan' taxi'ibi' Satanás. Bira

huelënan le'e. Naca Diuzi ben' cuëchi chizi guicho laxta'oro. Rulidza' xa'nro Jesucristo huela'iyanë' le'e. ²¹ Na' Timoteo, ben' ruelë në'ëdi' dyin quie Diuzi tuže, rugapanë' le'e diuži. Lëscan' rugapa ben' yedyi quia' Lucio, lënë' Jasón, lënë' Sosipater le'e diuži.

²² Lëscan' në'ëdi', Tercio, ben' bzu di'idza' lë'ë guichi niga, rugapa' le'e diuži laohue Cristo.

²³ Lëscan' Gayo, ben' zua' žan yu'u quie, ben' run posada yuguluro ben' nao xneza Cristo, len Erasto, ben' naca tesorero quie yedyi ni, rugapanë' le'e diuži. Lëscan' rugapa ben' bichiro Cuarto le'e diuži.

²⁴ Rulidza' xa'nro Jesucristo huela'iyanë' yugule. Amén.

Ga iyudyi carta ni rapa Pablo bala'ana Diuzi

²⁵ Lëscan' rulidza' Diuzi ta gacalënë' le'e ta bidzibile inaole xneza Cristo gata' quiele yela' neban tuzioli con cabë' rna xti'idza' Diuzi. Cana' baodixogui'a le'e de acuerdo con cabë' una cuin Cristo. Cana' bë Diuzi pensari huenë' dza na'te, dza binesi' laze cue' yedyi layu. Pero baquezi biuna Diuzi ca huenë' quiele. ²⁶ Ulezë' hasta hora, na'tera barnezan quie pensari bë Diuzi dza na'te. Barnezan por nun quie di'idza' la'iya bzu ben' unita' dza na' lë'ë guichi, ben' udixogue' xti'idza' Diuzi. Na'ra babë Diuzi mandado inezí yugulu ben' nita' lao yedyi layu con cabë' rna di'idza' la'iya quiénë' cuenda na' hue quieyaque' di'idza' quiénë'. Tuzioli zu Diuzi.

²⁷ Tuzi Diuzi zu. Tuzi lëbë' naquë' ben' rioñe'e. Tuzioli reya'ala' gaparo Diuzi bala'ana laohue ži'inë' Jesucristo. Amén.

**Xti'idza' Diuzi
New Testament in Zapotec, Choapan (MX:zpc:Zapotec,
Choapan)**

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

f44721e8-d767-55bd-8bcb-f1eb4965c7c2